

四庫全書

經部

欽定四庫全書

欽定春秋傳說彙纂卷二十五

襄公

集說

楊氏士勛曰魯世家襄公名午成公之子定姒所生周簡王十四年即位謚法因事有功曰襄

己簡王十
丑四年

元年

晉悼公周元年齊靈十年衛獻五年蔡景二十年鄭成十三年曹成六年陳成

二十七年杞桓六十五年宋平四年秦景五年楚共十九年吳壽夢十四年

春王正月公即位

穀梁

繼正即位正也

集說

孔氏穎達曰九年傳曰會于沙隨之歲寡君以生晉侯曰十二年矣知於是公年四歲

仲孫蔑會晉欒黶宋華元衛甯殖曹人莒人邾人滕人

薛人圍宋彭城

左傳

春己亥圍宋彭城非宋地追書也於是為宋討魚石故稱宋且不登叛人也謂之宋志彭城降

晉晉人以宋五大夫在彭城者歸寘諸狐丘齊人不會彭城晉人以為討二月齊太子光為質於晉

狐丘杜注晉地河東東垣縣東南有壺丘案壺丘亦曰陽壺窰宇志曰古陽壺城南臨大河今絳州

垣曲縣東南陽壺城是也屬山西平陽府

胡傳

案左氏曰非宋地追書也然則書圍彭城者魯史舊文也曰圍宋彭城者仲尼親筆也楚已取

彭城封魚石戍之三百乘矣則曷為繫之宋楚不得取之宋魚石不得受之楚雖專其地君子不登叛人所以正疆域固封守謹王度也

集說

杜氏預曰魯與謀於虛朮而書會者稟命霸主非匹敵故陸氏淳曰公羊曰不與楚專封也

趙子曰案此是楚取彭城令魚石守之耳豈名封國乎穀梁曰繫彭城於宋者不與魚石正也趙子曰與叛臣宣疑其為正哉意不應如此劉氏敞曰楚為不道獎亂助惡使臣叛其君春秋所惡也雖得其地春秋不與也凡諸侯受封於天子固有常分疆者不得獨兼弱者不得獨失有王者作疆者將損之弱者將益之故宋雖失彭城猶未為非宋也彭城言宋大鼎言部齊寶言衛取非其所有據非其所安可不戒哉師氏協曰苟書彭城而不書宋則無以見魚石之不臣楚子之獎亂與夫諸侯討叛之功矣孫氏

覺曰蒯賁出奔七年於外矣衛侯元卒而輒已立為君於蒯賁之納也必曰世子蒯賁若曰是乃世子也輒安得為君乎彭城已入於楚而以之居魚石矣於其圍之必曰宋彭城若曰彭城乃宋邑魚石安得受之於楚乎張氏洽曰案楚已取彭城封魚石今彭城非復宋地尚繫之宋傳曰諸侯為宋討魚石故稱宋且不登叛人也趙氏鵬飛曰伐叛討逆霸主之事也悼公之興首合諸侯之大夫為宋圍彭城討魚石得其職矣宜列國和會而願奉其役也然魚石之在彭城實楚置之以逼宋前年伐宋取彭城也則彭城非宋之有久矣聖人書之必繫之宋者正名定分如鼎取於宋必繫之郕名分正則天下定此春秋之教也齊國夏衛石曼姑圍戚不繫之衛而此圍彭城必繫之宋何也蓋圍戚者圍蒯賁也蒯賁雖見黜於父實衛之世子非叛人也則戚固其邑矣何必繫之衛哉彭城為楚所奪以封其叛人楚不得取之宋魚

石不得受之楚是其邑本宋邑也故必繫之宋焉子
奪之義於是甚明觀乎此而知聖人重名分也家
氏鉉翁曰書諸侯之大夫圍宋彭城褒之也為宋圍
彭城同盟之義也季氏本曰魚石倚楚為援據邑
要君非人臣之禮晉侯始起即合諸侯討之可謂急
於為義矣黃氏正憲曰晉悼初政勵精韓厥當國
善謀重以楚黨逆臣為惡故冬會虛打春圍彭城而
魯襄甫即位仲孫蔑即稱師助義可不謂賢大夫哉
北方積衰之世
實賴此復振矣

夏晉韓厥帥師伐鄭仲孫蔑會齊崔杼曹人邾人杞人

次于鄆

厥公作屈鄆公作合
注鄭地在陳留襄邑縣東南

左傳

夏五月晉韓厥荀偃帥諸侯之師伐鄭入其郭
敗其徒兵於洧上於是東諸侯之師次于鄆以

待晉師晉師自鄭以鄆之師侵楚焦夷及陳晉侯衛侯次於戚以為之援

潁上杜注潁水出密縣東南至長平入潁長平在今西華縣屬河南開封府

胡傳

楚人釋君而臣是助事已悖矣晉於是乎降彭城以魚石等歸遂伐鄭而諸侯次于鄆此皆放

於義而行者也傳書楚子辛救鄭而經不書者鄭無可救之善楚不得有能救之名經所以削之不言救也

集說

蘇氏轍曰諸侯之師會晉伐鄭故次于鄆以待之高氏閔曰晉以韓厥已足以當鄭不欲重

勤東諸侯之師故使次于鄆以震鄭心且備楚師之出也趙氏鵬飛曰伯主之伐鄭者屢矣必連諸侯之師扼之非以鄭之彊大也畏楚也使鄭外無楚援則偏師可以入其郭何以多為今晉之圖鄭亦可謂

有謀矣以韓厥獨攻其前以五國之兵援其後楚兵不出則一韓厥足以奪鄭而有餘楚兵出則五國之師足以闢楚而不懾此皆所以謹用諸侯而不忍輕關其民也故聖人書伐書次美其得問罪之舉說者徒見楚師侵宋乃曰次于鄆以救宋且楚至秋而後侵宋豈於此先次而豫救之不原所書之序矣况鄆鄭地也豈次於鄭而救宋耶不足據也戴氏溪曰韓厥身伐鄭而諸侯不與焉亦見悼公圖伯之初使大夫身親其勞不敢勤諸侯之師也汪氏克寬曰鄭棄北方而從荆蠻助叛臣以逼其君皆非義也晉悼公既禽五大夫於是伐鄭以討其從楚納魚石之罪然不重勤諸侯而使韓厥以偏師伐之皆合於義者也又曰自鄆陵之戰楚子救鄭楚子重救鄭楚公子申救鄭皆不書義與此同又曰齊桓伐楚楚次于陘不欲速戰以勝楚晉悼伐鄭而使諸侯之師次于鄆不欲速圍以虐鄭皆霸者不輕用兵而重民命之意

也故文定傳曰伐而書次其次為善羅氏喻義曰次止也料前軍能獨當鄭諸侯之師且止晉悼舉止安開同符齊桓伯亦有真也

秋楚公子壬夫帥師侵宋

左傳

秋楚子辛救鄭侵宋呂留鄭子然侵宋取犬丘

呂留杜注二縣今屬彭城郡案呂縣留縣漢屬楚國後漢及晉屬彭城國泗水至呂城積石為梁故曰呂梁徐州北五十里有呂梁城水經注濟水過沛縣東北又東南過留縣北漢張良遇漢高祖於留即此地也呂縣隋廢留縣唐廢今俱在徐州境犬丘杜注譙國鄴縣東北有犬丘城迂回疑案呂留鄭蓋為楚取也今河南歸德府永城縣西北

三十里有
太丘集

集說

孫氏復曰楚師侵宋所以救鄭也高氏閱曰不敢敵諸侯之師而侵宋者蓋攻其所必救也

以其無名加兵故書曰侵家氏鉉翁曰楚納宋之叛人晉以諸侯之師克彭城執五叛以歸楚不知自反以兵加宋將以雪恥恥益甚焉汪氏克寬曰楚憤宋之復彭城且欲援鄭而退諸侯之師故復釋憾於宋

九月辛酉天王崩

集說

杜氏預曰辛酉九月十五日

邾子來朝

左傳

九月邾子來朝禮也

集說

楊氏士勛曰世本及左傳邾宣公也季氏本邾子去年朝魯今襄公新立故復來朝以賀

之

冬衛侯使公孫剽來聘晉侯使荀瑩來聘

左傳

冬衛子叔晉知武子來聘禮也凡諸侯即位小國朝之大國聘焉以繼好結信謀事補闕禮之

大者也

集說

杜氏預曰冬者十月初王計未至故傳善之范氏甯曰王崩計未至皆未聞喪故各得行朝

聘之禮

徐氏彥曰天王崩而四國得行朝聘者杜氏云辛酉九月十五冬者十月初也四國行朝聘之

時王之訃告未至於魯楊氏士勛曰知王崩計未
至者禮諸侯為天子斬衰若其聞喪豈天子以九月
崩當月即邾子來朝冬初即晉衛來聘魯是有禮之
國焉得受之明知計未至故各得行朝聘之禮也猶
如襄二十九年吳子餘祭五月所弑計未至魯故季
札以六月至魯仍行聘事亦此類也若然經書九月
輟曰九月王崩十月計未至於諸侯故雖不廢朝聘
不為非禮李氏廉曰三國之朝聘胡氏本泰山孫
氏說賤之然穀注及公羊疏皆同杜氏說蓋如胡氏
說則此條當與蟲牢同譏但蟲牢明書己酉己丑相
去四十日計告之及必矣胡氏得之此則下無日未
有以辨其久近且三傳皆
無貶文恐杜說亦可取

案三國朝聘左氏皆以為禮杜氏預釋之曰王計未
至也公穀俱不發傳而范氏甯徐氏彥楊氏士勛咸

主杜氏蓋按日而稽之非臆度也胡傳必以為訃告已及恐無所據今從左氏

庚靈王二年晉悼二年齊靈十一年衛獻六年蔡景二寅元年十一年鄭成十四年曹成七年陳成二十

八年杞桓六十六年宋平五年秦景六年楚共二十年吳壽夢十五年

春王正月葬簡王

集說杜氏預曰五

鄭師伐宋

左傳春鄭師侵宋楚令也

集說許氏翰曰書伐宋者積鄭之疚

附錄左傳

齊侯伐萊萊人使正與子賂夙沙衛以索馬牛皆百匹齊師乃還君子是以知齊靈

公之為靈也

夏五月庚寅夫人姜氏薨

左傳

夏齊姜薨初穆姜使擇美楨以自為櫬與頌琴季文子取以葬君子曰非禮也禮無所逆婦養

姑者也虧姑以成婦逆莫大焉詩曰其惟哲人告之話言順德之行季孫於是為不哲矣且姜氏君之妣也詩曰為酒為醴烝畀祖妣以洽百禮降福孔偕

集說

孫氏復曰成公夫人家氏鉉翁曰齊姜襄公嫡母也與定姒並書卒葬而嫡妾之分見矣

六月庚辰鄭伯踰卒

踰古困反

左傳

鄭成公疾子駟請息肩於晉公曰楚君以鄭故親集矢於其目非異人任寡人也若背之是棄

力與言其誰睚我免寡人唯二
三子秋七月庚辰鄭伯踰卒

集說

杜氏預曰未與襄同盟而赴以名庚辰七月九日書六月經誤孔氏穎達曰經云六月庚辰

鄭伯踰卒傳言七月庚辰鄭伯踰卒經傳必有誤者杜以長厯校之此年六月壬寅朔其月無庚辰七月壬申朔九日得庚辰則傳與厯合知傳是而經誤也高氏閌曰不書葬者以成公附楚故諸侯不會葬也

晉師宋師衛甯殖侵鄭

左傳

於是子罕當國子駟為政子國為司馬晉師侵鄭諸大夫欲從晉子駟曰官命未改

集說

杜氏

預曰晉伐喪非禮宋雖非卿師重故叙衛

劉氏敞曰穀梁曰其曰衛甯殖如是而稱

於前事也說者曰初衛侯速卒鄭人侵之故舉甯殖

之報以明稱其前事皆非也將尊師少書將例然也

何至於此獨為異乎孔子曰以直報怨以德報怨若

人伐已喪已亦伐人喪是以怨報怨也豈以直報怨

者乎春秋豈為是書之哉孫氏覺曰晉宋稱師將

卑師衆也甯殖書名將尊師少也張氏洽曰士句

侵齊聞喪而還春秋與之則茲伐喪之罪不待貶而

見矣家氏鉉翁曰乘鄭喪而侵之失盟主之道矣

秋七月仲孫蔑會晉荀瑩宋華元衛孫林父曹人邾人

于戚

左傳

會于戚謀鄭故也孟獻子曰請城虎牢以偏鄭

知武子曰善鄭之會吾子聞崔子之言今不來

矣滕薛小邦之不至皆齊故也寡君之憂不唯鄭瑩將復於寡君而請於齊得請而告吾子之功也若不侯之福也豈惟寡君賴之請諸

集說

王氏荅曰諸侯之大夫專會以謀鄭政在大夫也

已丑葬我小君齊姜

左傳

齊侯使諸姜宗婦來送葬召萊子萊子不會故晏弱城東陽以偏之

東陽杜注齊境上邑今東陽城在山東青州府臨朐縣東

集說

杜氏預曰齊諡也三月而葬遠陳氏岳曰穆姜有美積頌琴文子取之以葬公羊不知婦先

姑薨故疑之也

叔孫豹如宋

左傳

穆叔聘於宋通嗣君也

集說

孫氏復曰叔孫豹僑如弟趙氏鵬飛曰叔氏自公孫茲叔孫得臣再世為卿至叔孫僑如其

橫滋甚詭謀一敗匍匐奔齊叔孫之黨沮矣今襄公即位幼未能君盟會征伐專於仲孫蔑蔑孟氏也季文子為正卿而實耄矣故叔氏復出而任聘問之事將以漸而干政也

冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

左傳

冬復會于戚齊崔武子及滕薛小邾之大夫皆會知武子之言故也遂城虎牢鄭人乃成

集說

趙氏匡曰公羊曰不書取諱也案夫子增損經文以示義觀文見義何諱之為陸氏淳曰趙

氏云不書取許其城也又曰淳聞於師曰諸侯之大夫取他國之邑相與城之非正也城虎牢可以安列國息征伐故聖人許之而不繫於鄭也劉氏敞曰穀梁曰內鄭也非也鄭不服晉諸侯伐之可謂外之矣反謂內之乎蘇氏轍曰鄭久從楚諸侯歲為之興師於是城虎牢以偏之明年而鄭受盟沈氏棐曰不言伐取且不繫之鄭皆所以與晉也張氏洽曰彭城非宋有也伯主為宋討則繫之宋虎牢鄭地也以伯主當討鄭而不繫之鄭皆春秋明王制以示予奪之正也呂氏大圭曰楚丘不言衛緣陵不言杞皆是衛杞不能有之而齊桓城之爾然則城虎牢亦鄭不能有而諸侯城之趙氏鵬飛曰安一國之功小安天下之功大安一國者以一國之辭書之圍宋彭城是也安天下者以天下之辭書之遂城虎牢

是也圍宋彭城為宋治叛臣爾其利不及天下故繫之宋遂城虎牢天下均蒙其安非鄭所得專也故不繫之鄭晉楚爭鄭五十年矣乍叛乍服惟彊是依鄭成一叛入楚晉厲敗之於鄢陵三合諸侯征之而不反蓋鄭入楚則楚兵將橫行於宋衛之郊天下諸侯為之不寧今晉悼之興規規然求所以得鄭之策諸大夫謀城虎牢以偪之虎牢既非鄭有鄭何恃以抗列國哉故兵出虎牢則直指鄭郊非特鄭無所恃楚失之蓋亦恐矣故雞澤之盟鄭不伐而至八國之君同沮是盟而天下無兵車之役者凡六年則虎牢之城誠有功於天下也此聖人所以不繫之鄭歟鄭氏玉曰遂者繼事之辭會畢而城之也前會于戚孟獻子已有是謀知武子未敢專於是歸告晉侯言之於齊帥諸國而舉是役非大夫之專事也汪氏克寬曰自平王東遷鄭武公入為卿士王賜之虎牢以東後失其地鄭厲公納惠王而王復與之焉然齊桓

之霸說申侯而與之虎牢則固未嘗以虎牢為北方之輕重也迨悼公之霸則近楚微國若江黃弦庸六蓼淠舒之類吞噬靡遺列國諸侯若陳若蔡若許亦已服役於楚夷於屬縣而鄭以王室懿親畿內大國又屈而從楚苟非阝虎牢之險以制其棄同即異之心則楚將越鄭而東蹂躪北方之境矣故虎牢之城不繫於鄭也陳氏際泰曰城虎牢所以扼楚亦所以制鄭未幾而為難澤之盟蓋三駕而楚不爭鄭不叛虎牢之城亦預有力也夫

案鄭方堅於從楚孟獻子請城虎牢以偏之所以扼鄭之吭而使之不得南向也攘楚服鄭實關天下之大計故不書城鄭虎牢況是時晉已取之非復鄭之所有自不得仍繫之於鄭也胡傳責鄭不能守恐於經旨未合夫春秋內晉而外楚豈欲鄭守險以拒晉乎張氏洽謂霸主討不服之國地非鄭所得私家氏

鉉翁謂鄭辱天子之封
守罪當削皆非篤論

楚殺其大夫公子申

左傳

楚公子申為右司馬多受小國之賂以偏子重
子辛楚人殺之故書曰楚殺其大夫公子申

集說

劉氏敞曰稱國以殺大夫者罪累上也公子申
之累上奈何嬰齊也壬夫也申也三人者執楚

國之政公子申賄而專嬰齊壬夫畏其偏也而殺之
是君與臣同國之道也蘇氏轍曰申罪不至死而

楚人殺之故稱國以殺高氏閌曰晉城虎牢
有以勝楚矣楚無所歸咎而殺其用事之臣

辛靈王三年晉悼三年齊靈十二年衛獻七年蔡景二
卯二年三年十二年鄭僖公髡頑元年曹成八年陳成

二十九年杞桓六十七年宋平六年泰
景七年楚共二十一年吳壽夢十六年

春楚公子嬰齊帥師伐吳

吳楚爭彊自此始

左傳

三年春楚子重伐吳為簡之師克鳩茲至於衡山使鄧廖帥組甲三百被練三千以侵吳吳人

要而擊之獲鄧廖其能免者組甲八十被練三百而已子重歸既飲至三日吳人伐楚取駕駕良邑也鄧廖亦楚之良也君子謂子重於是役也所獲不如所亡楚人以是咎子重子重病之遂遇心疾而卒

鳩茲杜注吳邑在丹陽蕪湖縣東今蕪湖縣東四十里有鳩茲港是也屬江南太平府 衡山杜注

在吳興府烏程縣南案烏程乃湖州府附郭縣也去蕪湖甚遠今太平府當塗縣東北六十里有橫

山似為近之

集說

許氏翰曰國政失御大臣相殘又外結吳怨而內與晉讎此共王之所以不振也 高氏閔曰

楚始志伐吳吳與鍾離之會故也楚自鄢陵之敗其勢稍屈畏諸侯并力謀之而吳乘其間故先伐吳以張其勢李氏廉曰經書楚君大夫之伐吳七始於此

公如晉

左傳

公如晉始朝也

集說

高氏閼曰童子侯不朝王蓋不可接以成人之禮也豈可反朝同列乎

夏四月壬戌公及晉侯盟于長檮

檮敕居反長檮孔氏穎達曰近城之地

左傳

夏盟于長檮孟獻子相公稽首知武子曰天子在而君辱稽首寡君懼矣孟獻子曰以敝邑介

在東表密邇仇讎寡君將君是望敢不稽首

集說

杜氏預曰晉侯出其國都與公盟於外孔氏

穎達曰文三年公如晉公及晉侯盟盟不書地
在晉都也此時晉侯出其國都與公盟于長檮蓋近
城之地盟訖還入於晉故公歸書曰公至自晉也文
三年盟于晉都此盟出城外者出與不出皆由晉侯
意耳此或是悼公謙以待人不致使國君就已出盟
於外若似相就然故出城也蘇氏轍曰禮諸侯不
親盟於他國成二年公如晉晉人使陽處父盟公三
年雖改盟而猶盟於其國亦非禮也晉悼公修禮於
諸侯故去其國而與公盟於長檮禮也高氏閌曰
出國都以與公盟此悼公之敬也張氏洽曰孟獻
子魯之賢大夫尚不知君臣之義以相其君所謂不
知先立乎其大者春秋諸賢之同病也家氏鉉翁
曰不於國都而盟於外謙也魯君童穉之年晉悼勤
於用禮書以美之李氏廉曰此正與魯及向戌盟
于劉同意蓋魯亦敬向戌特出而與之盟也襄如晉

五始於此年 汪氏克寬曰魯君朝晉而盟者四文
公有三焉晉襄首以陽處父盟公明年又要公盟於
國都靈公亦與公盟於其國惟此年晉悼公特去國
都而與公盟長檮有以見襄靈之倨而悼公之謙宜
悼公之能
復伯也

公至自晉

集說

杜氏預曰不以長檮至本非會 程氏端學曰
盟于長檮而至自晉者蓋公如晉則朝晉矣長

檮之盟乃朝後之事故東萊呂氏曰本
謀如晉而以如晉為重故不以長檮至

附錄左傳

祁奚請老晉侯問嗣焉稱解狐其離也將
立之而卒又問焉對曰午也可於是羊舌

職死矣晉侯曰孰可以代之對曰赤也可於是使祁
午為中軍尉羊舌赤佐之君子謂祁奚於是能舉善

矣稱其讎不為諂立其子不為比舉其偏不為黨商書曰無偏無黨王道蕩蕩其祁奚之謂矣解狐得舉祁午得位伯華得官建一官而三物成能舉善也夫惟善故能舉其類詩云惟其有之是以似之祁奚有焉

六月公會單子晉侯宋公衛侯鄭伯莒子邾子齊世子

光已未同盟于雞澤

雞澤杜注在廣平曲梁縣西南後漢志曲梁侯國有雞澤即春秋諸

侯同盟處也今曲梁故城在直隸廣平府東北

左傳

音為鄭服故且欲修吳好將合諸侯使士句告於齊曰寡君使句以歲之不易不虞之不戒寡

君願與一二兄弟相見以謀不協請君臨之使句乞盟齊侯欲勿許而難為不協乃盟於邠外六月公會

單頃公及諸侯已未同盟于雞澤晉侯使荀會逆吳子於淮上吳子不至

而杜注水名案郟水即時水也平地出泉曰郟

穀梁

同者有同也
同外楚也

胡傳

同盟或以為有三例一則王臣預盟而書同二則諸侯同欲而書同三則惡其反覆而書同夫

惡其反覆與諸侯同欲而書同信矣王臣預盟而書同義則未安盟于女栗及蘇子也而不書同盟于洮于翟泉會王人也而不書同然則此三盟者正所謂諸侯同欲而書同盟也其同欲奈何同病楚也會于柯陵之歲夏伐鄭楚人師于首止而諸侯還冬伐鄭楚人師于汝上而諸侯還雞澤之盟陳袁僑如會楚師在繁陽而韓獻子懼平丘之行楚棄疾立復封陳蔡而列國恐是知此三盟者諸侯皆有戒心而修盟

故稱同不以尹子單子劉子亦預此盟而譏之也夫
王臣將命必惇信明義而後可以表正乎天下諸侯
守邦必尊主奉法而後可以保其社稷今王臣下與
諸侯約誓諸侯亦敢上與王臣要言斯大亂之道也
則亦不待書同
盟而罪自見矣

集說

杜氏預曰周靈王新即位使王官伯出與諸侯
盟以安王室故無譏程子曰楚彊諸侯皆畏

之而修盟故書同高氏閼曰此因城虎牢之故鄭
服而同盟又諸侯同心病楚而王臣亦與焉故書同
去朱子曰襄公之世晉悼公出來整頓一番楚始退
張氏洽曰晉悼公始合諸侯尊王室而盟單子
與桓公首止葵丘異矣故書公會單子諸侯已未同
盟于難澤所以譏其儕王官於諸侯俾下同於畝血
其事不足乎揚故不再言難澤
而例之於新城同盟之書也

案諸侯不敢盟天子之臣而雞澤之盟單子與馬故胡傳以為大亂之道也杜氏預以為無譏蓋是時悼公初政伯業方新不敢盟同列於國中矧與王臣盟乎則單子受王命而來盟或當如杜注之說也今竝存之

陳侯使袁僑如會

僑其驕反

左傳

楚子辛為令尹侵欲於小國陳成公使袁僑如會求成晉侯使和組父告於諸侯

公羊

其言如會何後會也

穀梁

如會外乎會也於會受命也

集說

杜氏預曰陳疾楚政而來屬晉本非召會而自來故言如會范氏甯曰鄭嗣曰外乎會者明

本非會內也諸侯已會乃至爾高氏閼曰陳自辰陵即楚二十有八年晉屢爭鄭而不爭陳者非不爭陳也得鄭則亦得陳也今聞鄭伯受盟故俾大夫求成於晉本非召會來又後時故書如會

戊寅叔孫豹及諸侯之大夫及陳袁僑盟

諸侯在而大夫自為盟始

此於

左傳

秋叔孫豹及諸侯之大夫及陳袁僑盟陳請服也

公羊

曷為殊及陳袁僑為其與袁僑盟也

集說

杜氏預曰諸侯既盟袁僑乃至故使大夫別與之盟言諸侯之大夫則在雞澤之諸侯也殊袁

僑者明諸侯大夫所以盟盟袁僑也孔氏穎達曰上文雞澤之會其內未有陳侯直言諸侯之大夫則

不得包陳袁僑故殊之也 咥氏助曰穀梁曰諸侯
已盟又大夫相與私盟是大夫彊也諸侯盟已畢而
袁僑至故大夫與之盟再無他義 劉氏敞曰諸侯
之大夫則其言叔孫豹及之奈何恭也其恭奈何臣
無專命於君側叔孫豹及諸侯之大夫云者受命之
辭也又曰穀梁曰及以及與之也非也此兩及者文
當然耳何謂與之何謂不與之哉 蘇氏轍曰陳始
亦從楚令尹子辛侵欲於小國故陳成公使袁僑求
成於晉諸侯既盟而後袁僑至故復使大夫盟之殊
及袁僑主盟袁僑也穀梁曰諸侯盟又大夫相與私
盟大夫張也雞澤之會諸侯始失正矣夫諸侯不專
敵袁僑而使大夫盟之禮也且悼公晉之明主而以
為失正則過矣 孫氏覺曰雞澤之盟諸侯為會而
陳侯使袁僑往焉諸侯卑之不與盟戊寅之日使大
夫盟之再言及者所以別內臣與諸侯之大夫爾穀
梁以為大夫執國權案經意乃是諸侯不與袁僑盟

故使大夫大夫安得專權哉趙氏鵬飛曰悼公所
以霸諸侯之效在得陳得鄭而已陳鄭即楚久矣屬
公之威有所不能服今一興虎牢之役隻矢不遺而
鄭來歸陳覲鄭之歸而亦遣袁僑如會焉一會而得
二叛國其亦偉矣然鄭以君會而陳以臣至勢不可
以君臣同盟故難澤之盟以諸侯盟鄭之君戊寅之
盟以大夫盟陳之臣尊卑之分不其正歟蓋鄭伯之
來既與難澤之盟矣袁僑至而無以質之則懷附之
心不固苟復自及其盟則袁僑實伉而霸主之權不
尊故以大夫盟之則晉無屈已之辱而僑無伉君之
罪其禮甚安而分甚明此吾所以見悼公之賢也論
者不達乃曰諸侯在而大夫盟大夫專也溴梁之會
書大夫盟不先言諸侯盟則可謂諸侯會而大夫盟
矣責大夫之專可也叔孫豹及諸侯之大夫及陳袁
僑盟書諸侯之大夫則大夫奉君命而盟袁僑也何
得為專王氏樵曰大夫奉君命而盟袁僑非大夫

相與私盟也非大夫張也晉君方明六卿皆民譽諸侯和協何得因一盟而失政自是始乎但踐土之盟陳穆公如會文公未嘗再要以盟而陳服於晉歷三世而不叛袁僑受陳侯之指而來苟有誠服之心又何必汲汲以盟誓結之哉此則悼公不知本之過也黃氏正憲曰陳自從楚盟於辰陵至是二十有八年今鄭已同盟難澤則不能安枕矣然念背晉已久恐晉加罪故先遣袁僑如會以嘗之悼公方欲招攜懷遠故略其已往之罪使諸國大夫與僑盟則晉不屈已僑不抗君可以安反側之心可以廣招來之義此正悼公之賢也論者謂諸侯在此大夫不得專盟豈非拘攣之見乎

附錄左傳

晉侯之弟揚干亂行於曲梁魏絳戮其僕晉侯怒謂羊舌赤曰合諸侯以為榮也揚

干為戮何辱如之必殺魏絳無失也對曰絳無貳志事君不辟難有罪不逃刑其將來辭何辱命焉言終

魏絳至授僕人書將伏劒士魴張老止之公讀其書曰日君乏使使臣司司馬臣聞師衆以順為武軍事有死無犯為敬君合諸侯臣敢不敬君師不武執事不敬罪莫大焉臣懼其死以及揚干無所逃罪不能致訓至於用鉞臣之罪重敢有不從以怒君心請歸死於司寇公跣而出曰寡人之言親愛也吾子之討軍禮也寡人有弟弗能教訓使于大命寡人之過也子無重寡人之過敢以為請晉侯以魏絳為能以刑佐民矣反役與之禮食使佐新軍張老為中軍司馬士富為候奄楚司馬公子何忌侵陳陳叛故也

秋公至自會

集說

杜氏諤曰公踰時而返故致之

冬晉荀瑩帥師伐許

左傳

許靈公事楚不會於難澤
冬晉知武子帥師伐許

集說

蘇氏轍曰許事楚故也

張氏洽曰荀瑩悼公

保陳陳固則許何患其不來今遽帥師以問罪於許
規模欲速宜其并陳不能保也趙氏鵬飛曰晉既
得陳鄭矣其比於楚者許也故夏盟陳鄭而冬伐許
然許為鄭所虐遷於葉以避之葉逼近楚倚楚為重
必不能近叛楚而遠事晉也惟晉能
服楚則許可得不然徒征之無益矣

壬辰

靈王

四年

晉悼四年齊靈十三年衛獻八年蔡景二
十三年鄭僖二年曹成九年陳成三十年

杞桓六十八年宋平七年秦景八
年楚共二十二年吳壽夢十七年

春王三月己酉陳侯午卒

左傳

四年春楚師為陳叛故猶在繁陽韓獻子患之言於朝曰文王帥殷之叛國以事紂惟知時也

今我易之難哉三月陳成公卒楚人將伐陳聞喪乃止陳人不聽命臧武仲聞之曰陳不服於楚必亡大國行禮焉而不服在大猶有咎而況小乎夏楚彭名侵陳

繁陽杜注楚地在汝南鮑陽縣南今河南汝寧府新蔡縣北有繁陽亭

胡傳

午者襄公名也孔子作春秋在哀公之世襄公哀公之皇考也曷不諱乎古者死而無諡不以

名為諱周人以諡易名於是乎有諱禮故孟子曰諱名不諱姓姓所同也名所獨也然禮律所載則有不諱者夫子兼帝王之道參文質之中而作春秋以法萬世如公薨不地滅國書取出奔稱孫之類所以放其文也莊公名同而書同盟僖公名申而書戊申定公名宋而書宋人之類所以從其質也後世不明此

義則有以諱易人之名者又有以諱易人之姓者詩書則諱臨文則諱嫌名則諱二名則偏諱愚者違禮以為孝諂者獻佞以為忠忌諱繁名實亂而春秋之法不行矣

案陳通於楚楚窺北方陳其門戶也楚逞志於陳以為陵轢諸侯之計而與晉爭衡晉及諸侯當并力以謀陳而韓厥以文王事紂為比臧紂謂陳不服楚必亡二大夫之言何其陋也此陳之所以終為楚有也左氏亦以為陳無禮謬矣

夏叔孫豹如晉

左傳

穆叔如晉報知武子之聘也晉侯享之金奏肆夏之三不拜工歌文王之三又不拜歌鹿鳴之

三三拜韓獻子使行人子員問之曰子以君命辱於敝邑先君之禮藉之以樂以辱吾子吾子舍其大而

重拜其細敢問何禮也對曰三夏天子所以享元侯也使臣弗敢與聞文王兩君相見之樂也臣不敢及鹿鳴君所以嘉寡君也敢不拜嘉四牡君所以勞使臣也敢不重拜皇皇者華君教使臣曰必諮於周臣聞之訪問於善為咨咨親為詢咨禮為度咨事為諏咨難為謀臣獲五善敢不重拜

集說

高氏閱曰且為鄆世子故李氏廉曰襄公之編書聘晉者九始於此年

秋七月戊子夫人妣氏薨

如公作弋下定如同

左傳

秋定姒薨不殯於廟無襯不虞匠慶謂季文子曰子為正卿而小君之喪不成不終君也君長

誰受其咎初季孫為已樹六檟於蒲圃東門之外匠慶請木季孫曰略匠慶用蒲圃之檟季孫不御君子

曰志所謂多行無禮必自及也其是之謂乎

集說

杜氏預曰成公妾襄公母嬖杞姓孔氏穎達

之妾也據傳匠慶之言知是襄公之母高氏閔曰襄公以夫人之禮卒之家氏鉉翁曰此成公妾也

前年書夫人姜氏有兩夫人不加貶而義自見矣王氏錫爵曰定姒非嫡夫人故文子不欲成其為小

君之喪

葬陳成公

集說

汪氏克寬曰陳即晉魯會其葬故書

八月辛亥葬我小君定姒

公羊

定弋者何襄公之母也

集說

許氏翰曰傳載季文子欲不以夫人之禮葬定姒而不得已於人言卒夫人之觀此葬速禮略

也

王氏葆曰此葬定姒襄公之母也定十五年書葬定姒者哀公之母也自襄至哀涉世未久不應皆

諡曰定其必有誤高氏閔曰死纔二十三日爾

吳氏澂曰僖宣襄昭四妾母羣臣皆逢君之意而尊

其母及定哀之際君弱臣彊嗣君之母先君之嫡夫

人也乃敢蔑視其君而卑其母焉甚矣魯道之衰也

案春秋正名定分而於嫡庶尤嚴妾母見於經者成

風敬嬴定姒齊歸薨稱夫人葬稱小君與正嫡無異

皆所以明其失禮也孔氏穎達

謂嫡母薨則妾母尊殊失經旨

冬公如晉

左傳

冬公如晉聽政晉侯享公公請屬鄫晉侯不許孟獻子曰以寡君之密邇於仇讎而願固事君

無失官命節無賦於司馬為執事朝夕之命敝邑敝邑褊小闕而為罪寡君是以願借助焉晉侯許之

集說

王氏葆曰襄公之立至是繞七歲爾幼弱之君奔走道路所謂國君道長豈得已哉高氏閱

曰公有母喪復如晉朝

陳人圍頓

左傳

楚人使頓間陳而侵伐之故陳人圍頓

集說

高氏閔曰僖二十五年楚人圍陳納頓子于陳陳人畏楚而不敢討頓子恃楚而不事陳今陳

復從晉而頓為楚間故園之自雞澤之會而書伐許園頓著晉興而楚誑也家氏鉉翁曰陳既遣袁僑

如會故園頓治楚之屬國也程氏端學曰陳侯居喪不修德教民外禦彊楚而越喪興師圍楚之與國

以致寇比事而觀罪自見也李氏康曰陳圍頓以甚楚人之怨與鄭獲公子變以激楚之爭二事相類其後皆連兵數戰而不息非處已寡怨之道也且楚昔嘗圍陳而納頓今陳復圍頓以怒楚禍患之極安有已哉逃歸之兆在此矣

附錄左傳

無終子嘉父使孟樂如晉因魏莊子納虎豹之皮以請和諸戎晉侯曰戎狄無親而

貪不如伐之魏絳曰諸侯新服陳新來和將觀於我我德則睦否則攜貳勞師於戎而楚伐陳必弗能救是棄陳也諸華必叛獲戎失華無乃不可乎夏訓有之曰有窮后羿公曰后羿何如對曰昔有夏之方衰也后羿自鉏遷於窮石因夏民以代夏政恃其射也不修民事而淫於原獸棄武羅伯因熊髡尅圉而用寒浞寒浞伯明氏之讒子弟也伯明后寒棄之夷羿收之信而使之以為已相浞行媚於內而施賂於外

愚弄其民而虞羿於田樹之詐慝以取其國家外內咸服羿猶不悛將歸自田家衆殺而亨之以食其子其子不忍食諸死於窮門靡奔有鬲氏湼因羿室生澆及豷恃其讒慝詐偽而不德於民使澆用師滅斟灌及斟尋氏處澆於過處豷於戈靡自有鬲氏收二國之燼以滅湼而立少康少康滅澆於過后杼滅豷於戈有窮由是遂亡失人故也昔周辛甲之為大史也命百官官箴王闕於虞人之箴曰芒芒禹迹畫為九州經啓九道民有寢廟獸有茂草各有攸處德用不擾在帝夷羿冒於原獸忘其國恤而思其麇壯武不可重用不悛於夏家獸臣司原敢告僕夫虞箴如是可不懲乎於是晉侯好田故魏絳及之公曰然則莫如和我乎對曰和我戎有五利焉戎狄荐居貴貨易土土可賈焉一也邊鄙不聳民狎其野穡人成功二也戎狄事晉四鄰振動諸侯咸懷三也以德綏戎師使不勤甲兵不頓四也鑒於后羿而用德度遠至邇

安五也君其圖之公說使魏絳盟諸戎修民事田以時冬十月邾人莒人伐鄆臧紇救鄆侵邾敗於狐駘國人逆喪者皆髻魯於是乎始髻國人誦之曰臧之狐裘敗我於狐駘我君小子朱儒是使朱儒朱儒使我敗於邾

無終杜注山戎國名案秦置無終縣項羽封韓廣為遼東王都無終即今順天府玉田縣也縣西有古無終城有窮杜注國名水經注窮水出於安豐昭二十七年楚與吳師過於窮即此也今在英山縣境鉏杜注邿本國名今直隸大名府滑縣東十五里有鉏城寒杜注寒國北海平壽縣東有寒亭唐初有寒水縣屬濰州即故寒亭也今寒亭在山東萊州府濰縣東北五十里有高杜注國名平原高縣案高偃姓皋陶之後封於高今山東濟南府德平縣東一里有故高城斟灌杜注

夏同姓諸侯樂安壽光縣東南有灌亭今斟灌城
在山東青州府壽光縣東北四十里斟尋杜注

夏同姓諸侯北海平壽縣東南有斟亭今斟城在
山東青州府濰縣西南五十里過杜注國名東

萊掖縣北有過鄉郡國志掖縣有過鄉即過國也
今為萊州府治文杜注在宋鄭之間狐駘邾

邑杜注魯國菑縣東南有目台亭今狐
駘山在山東兗州府滕縣東南二十里

癸靈王五年晉悼五年齊靈十四年衛獻九年蔡景二
巳四年十四年鄭僖三年曹成十年陳哀公溺元

年杞桓六十九年宋平八年秦景九
年楚共二十三年吳壽夢十八年

春公至自晉

集說

高氏閼曰著公不朝正於廟也且公幼而頻年
如晉是危道也襄之出二十四致之者二十一

危之也

附錄左傳

王使王叔陳生愬戎於晉晉人執之士魴如京師言王叔之貳於戎也

夏鄭伯使公子發來聘

左傳

夏鄭子國來聘通嗣君也

集說

杜氏預曰發子產父高氏閔曰鄭自雞澤之會始來聘於諸侯得以息兵修好也趙氏鵬

飛曰鄭僖新立雖與雞澤之盟而聘使未交於諸侯故以發來聘然鄭成陷於楚今僖公復從禮義之風

行聘問之禮亦足以榮矣李氏廉曰魯與鄭自輸平來盟以後未嘗有聘問之使終春秋僅見於此則

以悼公之盛諸侯之睦也

叔孫豹鄫世子巫如晉

左傳

穆叔觀鄫大子於晉以成屬鄫書曰叔孫豹鄫大子巫如晉言比諸魯大夫也

公羊

外相如不書此何以書為叔孫豹率而與之俱也

穀梁

外不言如而言如為我事往也

集說

杜氏預曰豹與巫俱受命於魯故不書及比之魯大夫陸氏淳曰淳聞於師曰鄫列國也使

其世子同於我大夫魯與晉俱失正矣鄫力不足者故無譏焉石氏介曰不書及內之也鄫有國而私屬於人魯晉之私屬鄫也皆不臣之著也劉氏敞曰鄫請於魯為之附庸故相與往見於晉也鄫曷為為附庸於魯鄫不勝莒魯之患求為附庸以自定諸侯死社稷正也不能守其國以卑其宗廟鄫失正矣

天子建附庸非天子命而私有之魯失正矣故曰叔孫豹鄆世子巫如晉猶吾大夫焉交譏之孫氏覺曰明年莒人滅鄆則是晉失霸主之道而魯大夫之往為無益矣王氏葆曰凡外相如不書書者必有謂也叔孫率鄆大夫如晉故不書會與及然鄆雖小亦國也請於晉而屬之比諸魯大夫而覲之是推天子之禮以事霸主也故參譏之汪氏克寬曰諸侯之子世子未誓以皮帛繼子男而亞於大夫之列非禮也然春秋時較疆弱之勢而無君臣之分以大國之卿當小國之君故鄆國微弱而其世子次於魯大夫也叔孫豹偕鄆世子巫如晉而不言及是旅見於霸國也仲孫蔑衛孫林父受命於晉以會吳而不言及是旅見於吳也旅見於晉猶之可也旅見於吳甚矣

仲孫蔑衛孫林父會吳于善道

道公穀作稻善道杜注地闕案阮勝之而克

州記云盱眙本吳善道地秦置盱眙縣許慎曰張目為盱舉目為盱城居山上可以矚遠故曰盱眙今屬江南鳳陽府泗州

左傳

吳子使壽越如晉辭不會于雞澤之故且請聽諸侯之好晉人將為之合諸侯使魯衛先會吳

且告會期故孟獻子孫文子會吳于善道

集說

杜氏預曰魯衛俱受命於晉故不言及吳先在善道二大夫往會之故曰會吳孔氏穎達曰

不序吳於林父之下而別云會吳者為吳人先在善道蔑與林父往彼會之故云會吳也十年會吳于柵成十五年會吳于鍾離皆是吳在彼地往彼會之故殊會吳也下戚會不殊吳者來會于戚故與諸國同序列也劉氏敞曰晉將合諸侯于戚吳子不至使魯衛先之爾許氏翰曰晉楚爭衡權之在吳故晉

急吳如此季氏本曰晉將邀吳為戚之會而魯衛近吳且俱同姓故晉命以通好焉

秋大雩

左傳

秋大雩旱也

集說

高氏閔曰因旱祭志僭也

楚殺其大夫公子壬夫

左傳

楚人討陳叛故曰由令尹子辛實侵欲焉乃殺之書曰楚殺其大夫公子壬夫貪也君子謂楚

共王於是不刑詩曰周道挺挺我心局局講事不令集人來定已則無信而殺人以逞不亦難乎夏書曰

成功

集說

杜氏預曰共王敗於鄢陵後殺子反公子申士

夫者罪累上也壬夫之累上奈何前此者陳鄭去楚即晉楚人伐之不服媾之不可楚子怒曰壬夫實侵欲焉乃殺之是遷也然則士夫之罪何壬夫之為人臣也怙勢而懷利足以殺其身已矣蘇氏轍曰壬夫固有罪矣廢而勿用可也殺之過矣故稱國以殺王氏葆曰壬夫之貪有取死之道矣經以國殺大夫為文者陳之叛楚在子辛楚子既不能明法教以律貪人又不能殺貪人以謝小國乃擁其罪人興兵致討而陳恨彌篤方歸罪子辛而殺之故稱國以殺罪累上也家氏鉉翁曰前殺公子申曰受小國之賂令殺士夫又以侵欲於陳而使之叛楚猶有政二大夫不為無罪但用刑過慘春秋不與也

公會晉侯宋公陳侯衛侯鄭伯曹伯莒子邾子滕子薛

伯齊世子光吳人鄫人于戚

左傳

九月丙午盟于戚會吳且命戍陳也穆叔以屬鄫為不利使鄫大夫聽命于會

公羊

吳何以稱人吳鄫人云則不辭

胡傳

吳何以稱人案左氏吳子使壽越如晉請聽諸侯之好晉人將為之合諸侯使魯衛大夫會吳

于善道且告會期然則戚之事乃吳人來會不為主也來會諸侯而不為主則進而稱人諸侯往與之會而主吳則賤而稱國聖人之情見矣春秋之義明矣

集說

杜氏預曰不復殊吳者吳來會于戚石氏介曰成九年為蒲之會將以會吳而吳不至故十

五年諸侯之大夫會之于鍾離前三年悼公盟雞澤使荀會逆吳子而又不至故此年使魯衛先會之于

善道凡此皆往會之也至秋戚之會序吳於列而不復殊者因其來會也凡序吳者來會我也殊吳者往會之也劉氏淑曰吳曷為序鄩之上抑鄩也曷為抑鄩鄩不能國非諸侯之列也程子曰吳來會非為主也蘇氏轍曰吳之稱人與鄩皆列不可曰吳鄩人也鄩之復列於會魯人不利屬鄩也張氏洽曰戚之會因吳之來而命戍陳自桓文以來所以服陳者未聞以兵守之也士匄知戍陳之非長策是以有喪陳之嘆孔子曰遠人不服則修文德以來之既來之則安之晉為安陳之計如此何以能保陳乎李氏廉曰晉悼公謂魏絳曰八年之中九合諸侯始於此年會戚一也冬會城棣救陳二也七年會鄩三也八年邢丘四也九年戲五也十年柰六也又戊鄭虎牢七也十一年亳城北八也會蕭魚九也蓋自四年至十一年為八年

公至自會

冬戍陳

公羊

孰戍之諸侯戍之曷為不言諸侯戍之離至不可得而序故言我也

集說

杜氏預曰諸侯在戚會皆受命戍陳各還國遣戍不復有告命故獨書魯戍程子曰非王命

而勤民遠戍罪也而善於戍陳何哉蓋陳附晉國而楚爭之則戍之者在於助陳而距楚與之可也葉

氏夢得曰孰戍之我也會戚之諸侯既受命於晉而歸各為之戍陳以備楚不言諸侯散辭也高氏闕

曰此諸侯同戍非獨魯戍之也書於公至之後則知諸侯各還國而遣戍與僖二年城楚丘同義汪氏

克寬曰悼公之戍陳有恤諸侯之義惜其以為有陳非吾事人心不協而不卒戍遂至於失陳也

楚公子貞帥師伐陳公會晉侯宋公衛侯鄭伯曹伯齊

世子光救陳

曹伯下公穀有莒
子邾子滕子薛伯

左傳

楚子囊為令尹范宣子曰我喪陳矣楚人討貳
而立子囊必改行而疾討陳陳近於楚民朝夕

急能無往乎有陳非吾事也無之而後可冬諸侯
戍陳子囊伐陳十一月甲午會於城棣以救之

城棣杜注鄭地陳留酸棗縣西南有棣城寰宇記
有南棣城北棣城在陽武縣北十里二棣城之間

有博浪河亭即子房擊始皇處也今屬河南開封府

集說

高氏閼曰陳方附晉諸侯既戍之復為楚所伐
又相率救之救之義事也陳氏傅良曰書救

陳何陳不服也陳自辰陵不與諸侯之會三十年矣
悼公伯而難澤之盟袁僑至戚之會陳侯至諸侯為

之戍陳而楚有公子貞之師於是救陳又明年會于鄆陳侯逃歸自是凡會同無陳矣家氏鉉翁曰戍者戍之於無事之時救者救之於被兵之日悼公既以諸侯之師戍之及楚師之來以戍為未足又動大兵往救焉書戍書救以善晉也

十有二月公至自救陳

穀梁

善救陳也

集說

范氏甯曰善之故以救陳致

辛未季孫行父卒

左傳

季文子卒大夫入斂公在位宰庀家器為葬備無衣帛之妾無食粟之馬無藏金玉無重器備

君子是以知季文子之忠於公室也
相三君矣而無私積可不謂忠乎

集說

高氏閔曰自文子卒而魯有城費作三軍事則知文子雖專而猶忠慎僭亂未啓也其子宿嗣

是爲武子季氏之彊萌於僖公
大於成公熾於襄昭極於定哀

甲午

靈王

六年

晉悼六年齊靈十五年衛獻十年蔡景二
十五年鄭僖四年曹成十一年陳哀二年

杞桓七十年宋平九年秦景十年
楚共二十四年吳壽夢十九年

春王三月壬午杞伯姑容卒

左傳

六年春杞桓公卒始
赴以名同盟故也

集說

趙氏鵬飛曰杞自入春秋至是始以名訃於諸
侯而葬配以謚其初蓋微弱不能行其禮諸侯

亦從而眇之葬有所不會至此始會之故書葬杞桓公汪氏克寬曰桓公自僖二十七年來朝成九年來逆叔姬之喪此年卒子句嗣嚴氏啓隆曰姑容立於僖之二十四年在位七十年而卒事魯最恭末年復嫁於晉悼杞君告卒至是始書名魯亦始會葬自是以後杞之卒葬始備見於春秋

夏宋華弱來奔

左傳

宋華弱與樂轡少相狎長相優又相謫也子蕩怒以弓楛華弱於朝平公見之曰司武而楛於

朝難以勝矣遂逐之夏宋華弱來奔司城子罕曰同罪異罰非刑也專戮於朝罪孰大焉亦逐子蕩子蕩射子罕之門曰幾日而不我從子罕善之如初

集說

高氏閔曰不言逐而以自奔為文者朝廷尚敬而弱瀆慢如此所以罪弱也家氏鉉翁曰案

左傳亦逐樂轡不書
著用刑之不平也

秋葬杞桓公

集說俞氏皋曰杞小而去魯遠舊雖來赴而魯不往會葬今之會葬者蓋以婚姻之故也叔姬嫁於

杞女也

滕子來朝

左傳秋滕成公來朝始朝公也

集說季氏本曰滕向無朝矣此復來朝者以魯睦於晉賴魯以爲庇耳

莒人滅鄆

左傳

莒人滅鄆
鄆恃賂也

集說

陸氏淳曰公羊此年無傳五年傳云莒女有爲

祭祀滅亡之道也趙子曰此蓋昭四年經云取鄆以爲若今實滅之不合如此所以云立異姓也案莒今滅鄆以爲附庸後魯取得之何妨書取鄆乎且定六年鄭滅許哀元年許復見於經則鄆之滅而再見亦何足怪若鄆人實取外孫爲國嗣罪自在鄆非莒之過則經文又當如梁亡之類而言鄆亡不得書滅且以人情物理言之鄆雖小國亦有君臣社稷豈肯居然取於異姓爲後乎孫氏復曰昭四年書取鄆此而言滅者蓋莒滅之以爲附庸爾張氏洽曰案呂氏以爲鄆莒小國而自相滅亡蓋是時禮義衰絕滅國之大惡以爲常事皆目見之熟而莫之顧也愚謂晉女叔齊對平公治杞田之問以爲武獻以下兼國

多矣誰得治之然則晉蓋吞滅之首也固無以正諸侯之相滅豈特目見之常事哉宜晉悼雖賢終無以戢諸侯之相滅也呂氏大圭曰此直是莒人滅鄆耳立異姓之事未敢深信趙氏鵬飛曰晉為盟主受魯之託乃不能庇一鄆莒人滅之亦不能問烏在其為盟主也程氏端學曰鄆懼莒而求庇於晉晉與之為戚之會矣坐視其滅而不問此伯業之所以卑也李氏廉曰四年公如晉請屬鄆晉以鄆屬魯其冬邾人莒人伐鄆臧孫紇救鄆侵邾敗於狐駘五年穆叔覲鄆太子巫於晉九月會于戚穆叔以屬鄆為不利使鄆大夫聽命於會六年莒人滅鄆晉人來討季武子如晉謝亡鄆此左傳鄆事之本末也李氏本曰穀梁曰莒人滅鄆非滅也立異姓以蒞祭祀滅亡之道也以經文考之則未有以見其必然者夫滅國與絕世其事不同其辭亦當有異聖人豈肯含糊不明使人難曉哉

案莒人滅鄆經文甚明襄八年莒以疆鄆田伐魯東鄆則鄆為莒滅無疑也左氏以為鄆恃賂蓋鄆之託魯必有賂而魯不終其託故為莒滅耳公穀以昭四年取鄆遂疑鄆未嘗滅而有立異姓之說趙氏匡駁之謂鄆果以外孫為嗣則其罪在鄆經當如梁亡之類而書鄆亡不得書滅又以為鄭既滅許而許復見經考據頗詳今故不取公穀而凡以為立異姓者俱刪之

冬叔孫豹如邾

左傳

冬聘且修平如邾

集說

高氏閔曰公初即位邾子來朝四年有狐駘之戰至是往聘修平以無忘舊好也李氏廉曰

春秋書魯聘邾止此一條

季孫宿如晉

左傳

晉人以鄫故來討曰何故亡
鄫季武子如晉見且聽命

集說

杜氏預曰宿始代父為卿見大國許氏翰曰
魯既世卿而大夫無復三年之喪哀典廢於下

矣

張氏洽曰晉不討莒而討魯偏矣宜乎無以正

小國之罪

趙氏鵬飛曰宿行父之子也父喪未期

而執使命知世卿以固位而已不顧夫禮聖人志之

以見世爵之過襄公幼弱蓋非公意宿自為之矣三

家之專其可忍哉王氏元杰曰春秋之時嗣君繼

立踰年而用吉禮是豈先王之制哉行父以五年冬

卒宿以踰年出使異乎三年之喪而從政矣考之仲

孫蔑卒仲孫速會莒人盟于向仲孫宿卒仲孫羯帥

師侵齊典禮之失一至於此春秋

謹而書之以見魯國喪禮之失也

十有二月齊侯滅萊

左傳

十一月齊侯滅萊萊恃謀也於鄭子國之來聘也四月晏弱城東陽而遂圍萊甲寅堙之環城

傳於堞及杞桓公卒之月乙未王湫帥師及正與子崇人軍齊師齊師大敗之丁未入萊萊共公浮柔奔崇正與子王湫奔莒莒人殺之四月陳無宇獻萊宗器於襄宮晏弱圍萊十一月丙辰而滅之遷萊於郕高厚崔杼定其田

索杜注萊邑也北海即墨縣有崇鄉今縣南八
十里有甘棠社即古棠鄉也屬山東萊州府

公羊

易為不言萊君出奔
國滅君死之正也

集說

高氏閏曰齊圖萊久矣自宣
七年伐萊自是而遂滅之

乙靈王七年晉悼七年齊靈十六年衛獻十一年蔡景
未六年

年杞孝公勾元年宋平十年秦景十
一年楚共二十五年吳壽夢二十年

春郊子來朝

左傳

七年春郊子來
朝始朝公也

集說

季氏本曰成七年吳伐鄭鄭既從吳至是吳與
晉通好而遂不禁鄭之親魯故復來朝以修舊

好

夏四月三卜郊不從乃免牲

左傳

夏四月三卜郊不從乃免牲孟獻子曰吾乃今
而後知有卜筮夫郊祀后稷以祈農事也是故

啓蟄而郊，郊而後耕。今既耕而卜郊，宜其不從也。

穀梁

夏四月不時也。三卜禮也，乃者亡乎人之辭也。

集說

汪氏克寬曰：公穀啖氏皆以三卜為合禮。朱子亦云：四卜五卜失禮。然春秋四書卜郊，唯此年

三卜亦書之者，蓋三卜雖得禮而不敬，以致龜違，故書以譏。非時而非，譏其瀆卜也。

小邾子來朝

左傳

小邾穆公來朝，亦始朝公也。

集說

季氏本曰：終春秋之世，小邾卒葬不書，無以考其世矣。

城費

秘費音

左傳

南遺為費宰叔仲昭伯為隧正欲善季氏而求媚於南遺謂遺請城費吾多與而役故季氏城

費

胡傳

費季氏邑也文子相三君無衣帛之妾無食粟之馬無藏金玉無重器備則固忠於公室而不

顧其所食之私邑也及行父卒宿之不忠遂專魯國之政牽小媚之無故勞民妄興是役季氏益張其後孔子行乎季孫三月不違至於帥師墮費其越禮不度可知矣然則書城費乃履霜堅冰之戒彊私家弱公室之萌據事直書而義自見矣用人不惟其賢惟其世豈不殆哉

集說

孫氏復曰季氏四月城所食邑其專可知也家氏鉉翁曰季孫行父身死子繼首城賜邑將

以抗君而專國春秋書以著犯上作亂之漸李氏
廉曰費魯彊邑僖元年賜季友汶陽之田及費於是
為季氏邑矣自南遺既城之後費邑彊南蒯繼為費
宰非特季氏世卿而陪臣亦世其邑昭十二年南蒯
欲出季氏不克以費叛如齊十三年叔弓圍費弗克
敗焉十四年費人叛南氏蒯奔齊齊來歸費及季桓
子立公山不狃為費宰定八年不狃以費叛十二年
始用子路墮三都不狃叔孫輒帥費人襲魯孔子命
申句須樂頎伐之二子奔齊遂墮費此一費之始終
也而季氏之盛衰可考矣汪氏克寬曰此書城費
而昭十三年書圍費定十二年書墮費後十五年書
城成郭而昭二十六年定十二年書公圍成比事以
觀則知大夫之彊恃其城郭之固由人君不謹其初
之所致也公室卑而大夫專大夫弱而家臣叛夫豈
無自而然哉

秋季孫宿如衛

左傳

秋季武子如衛報子叔之聘且辭緩報非貳也

集說

趙氏鵬飛曰公即位衛侯使公孫剝來聘晉侯使荀瑩來聘既而公如晉者再大夫如晉者三

而衛侯之聘則未嘗報也今七年而後季孫宿報之其緩可知矣衛雖弱於魯固不敢責報然亦疑魯之外衛矣故冬孫林父來聘且要盟也汪氏克寬曰比書滕鄭小邾來朝而志大夫如晉如衛著邦交之煩而畏大慢小之情見矣季氏本曰時仲孫蔑執政政務睦鄰故多通使鄰國宿非私行也或意所欲往而因以植黨則有之矣

八月螽

集說

杜氏預曰為災故書高氏閼曰莊公以前螟猶書之莊公以後螟不復書螽然後書以是知

災異之益多矣春秋不勝其書舉重以見輕爾

附錄左傳

冬十月晉韓獻子告老公族穆子有廢疾將立之辭曰詩曰豈不夙夜謂行多露又

曰弗躬弗親庶民弗信無忌不才讓其可乎請立起也與田蘇游而曰好仁詩曰靖共爾位好是正直神之聽之介爾景福恤民為德正直為正正曲為直參和為仁如是則神聽之介福降之立之不亦可乎庚戌使宣子朝遂老晉侯謂韓無忌仁使掌公族大夫

冬十月衛侯使孫林父來聘壬戌及孫林父盟

左傳

衛孫文子來聘且拜武子之言而尋孫桓子之盟公登亦登叔孫穆子相趨進曰諸侯之會寡

君未嘗後衛君今吾子不後寡君寡君未知所過吾子其少安孫子無辭亦無悛容穆叔曰孫子必亡為臣而君過而不悛亡之本也詩曰退食自公委蛇委蛇謂從者也衡而委蛇必折

楚公子貞帥師圍陳

集說

胡氏銓曰前書伐陳未足以克陳也此書圍陳則以兵合而守之書此以見楚之憑陵列國極

矣屢書公子貞帥師亦見貞之專楚也趙氏鵬飛曰伐陳而未得志今復罄兵而圍之宜陳有所不堪故鄆之會陳侯逃歸李氏廉曰圍國書大夫自公子貞始

十有二月公會晉侯宋公陳侯衛侯曹伯莒子邾子于

鄆

鄆穀或作隔于軌反鄆杜注鄭地

左傳

楚子囊圍陳會于鄢以救之

集說

杜氏預曰謀救陳陳侯逃歸不成救故不書救也孔氏穎達曰楚既圍陳而陳侯亦列於會

者當是圍之不密故陳侯得出會求救也陳侯逃歸陳遂屬楚諸侯不與楚戰各自罷歸不成爲救故不書救也高氏閔曰晉悼將修文公之業復有志於攘楚而楚先圍陳陳侯遂出會諸侯以求救於晉晉悼於是遽爲之合諸侯也汪氏克寬曰自是凡會同無陳矣季氏本曰楚以十月圍陳將歷一冬而悼公始會諸侯遷延鄭地是有畏楚之心而不能急救陳也豈真有意懷陳者哉

鄭伯髡頑如會未見諸侯丙戌卒于鄢

髡苦門反公穀作髡原鄢七報

反又采南反公穀作鄢杜注鄭地

左傳

鄭僖公之為太子也於成之十六年與子罕適晉不禮焉又與子豐適楚亦不禮焉及其元年

朝於晉子豐欲懇諸晉而廢之子罕止之及將會于鄆子罕相又不禮焉侍者諫不聽又諫殺之及鄆子罕使賊夜弑僖公而以瘡疾赴於諸侯簡公生五年奉而立之

公羊

操者何鄭之邑也諸侯卒其封內不地此何以地隱之也何隱爾弑也未見諸侯其曰如會何

致其意也

穀梁

禮諸侯不生名此其生名何也卒之名也卒之名則何為如之如會之上見以如會卒也

胡傳

案鄭僖公三傳皆以為弑左氏則曰以瘡疾赴也春秋變文而書曰卒於鄆見其弑而隱之也

集說

杜氏預曰實為子罕所弑以瘡疾赴故不書弑稱名為書卒同盟故也如會會於鄆也未見諸

侯未至會所而死鄆鄭地不欲再稱鄭伯故約文書其名於會上陸氏淳曰趙子曰凡諸侯死例書名此則為上文已言鄭伯如會下不可又言鄭伯髡頑卒又不可上言鄭伯如會下但言髡頑卒所以須於如會時便書名以便其文耳劉氏敞曰鄆者何鄭之邑也諸侯卒其封內不地其曰鄭伯髡頑如會未見諸侯卒于鄆何見其以如會而卒也何見乎其以如會而卒傳曰弑也孰弑之其大夫公子騂弑之公子騂弑之奈何公子騂執鄭國之政鄭伯不禮焉公子騂怒鄭伯將會諸侯廢之公子騂欲與楚鄭伯曰不可公子騂於是使賊弑鄭伯此弑也曷為不言其弑以卒赴也以卒赴則曷為遂書之徧絕其臣子也曷為徧絕其臣子弑君凡在官者殺無赦子弑父凡在官者殺無赦故君弑臣不討賊命之曰非臣親弑子不復讎命之曰非子非臣非子大惡莫甚焉鄭非無臣子也君子即其所以赴於諸侯而遂書之見

鄭之無臣子也弑君多矣曷爲獨於此爲偏絕其臣
子曰趙盾之弑其君也董狐書之以示於朝赴於諸
侯仲尼曰良史也崔杼之弑其君也太史書之崔杼
殺之其弟又書之又殺之其弟又書之乃舍之然後
以赴於諸侯曰崔杼弑其君也弑君有四有絕其君
者有絕其臣者有非所絕而絕之者有舉其臣子而
絕之者此之謂也許氏翰曰辭繁而不殺曰如會
曰未見諸侯善其志在於見諸侯也胡氏寧曰鄭
髡頑楚麋齊陽生書卒皆存天理抑人欲之意陳
氏傅良曰此公子駢弑其君也則其書卒何以君薨
赴也君弑矣晏然赴於他國但如恒喪自鄭駢始甚
矣無人紀也而鄭之臣子聽焉春秋之所甚懼也是
故書卒所以誅鄭之臣子聽賊之所爲也汪氏克
寬曰或引吳子遏伐楚門子巢卒謂髡頑書名義與
遏同實卒而非弑也今考遏之死三傳皆云巢人之
射則鄭僖變文實弑而非卒矣

案經書鄭伯卒而三傳皆曰被弑趙氏匡信經而疑傳似亦有見然左氏去聖未遠公穀皆原本於聖門當日必有所據明年鄭羣公子以僖公之死謀子駟則子駟之弑君可知矣劉氏敞謂從赴書卒以見鄭無臣子是也公羊以為諱穀梁以為君不勝其臣皆非經旨

陳侯逃歸

左傳

陳人患楚楚慶虎慶寅謂楚人曰吾使公子黃往而執之楚人從之二慶使告陳侯於會曰楚人執公子黃矣君若不來羣臣不怨

社稷宗廟懼有二圖陳侯逃歸

穀梁

以其去諸侯故逃之也

胡傳

穀梁子曰逃義曰逃逃者匹夫之事上二年諸侯成陳今楚令尹來伐諸侯又救之亦既勤矣

為陳侯計者下令國中大申儆備立太子以固守親聽命於諸侯謀禦敵之策當是時晉君方明八鄰和睦諸侯聽命必能致力於陳矣不此之顧棄儀衛而逃歸此匹夫之事耳夫義路也禮門也是不能由是路出入是門故書逃歸以罪之可謂深切著明矣

集說

高氏閼曰楚人以陳叛故殺公子壬夫而亟討陳晉雖為陳再合諸侯卒不能攘楚以安陳故

陳侯內為二慶所逼而逃歸也然為一國之君而不能自立若匹夫之逃亦可羞矣李氏廉曰陳自此後直至襄二十七年昭元年宋統之會始與則以晉楚之分霸故也汪氏克寬曰春秋於諸侯之逃楚者皆不書惟陳鄭之逃則書之所以辨內外而予齊晉也李氏本曰陳侯不能以義激晉使速發兵乃效匹夫之事私逃而歸豈得為禮義之君哉

案陳侯以國難逃歸說者以背晉從楚為陳罪持論甚正而其實晉之不欲有陳固已早有成算矣晉之圖霸汲汲於得宋得鄭而陳在所緩范宣子曰陳非吾事無之而後可故五年楚伐陳晉合諸侯以救之猶有恤患之意七年楚圍陳晉雖再合諸侯而不成救鄆之會陳侯逃歸邢丘之盟陳侯不至晉皆置若罔聞晉之謀陳者日以疎而楚之謀陳者日以迫則陳之從楚乃晉之棄陳也春秋書之亦以譏晉伯之不振焉耳

丙靈王八年晉悼八年齊靈十七年衛獻十二年蔡景申七年二十七年鄭簡公嘉元年曹成十三年陳

哀四年杞孝二年宋平十一年秦景十二年楚共二十六年吳壽夢二十一年

春王正月公如晉

左傳

八年春公如晉朝且聽朝聘之數

集說

孫氏復曰公前年會諸侯于鄆不至者公自鄆朝晉也李氏廉曰左氏疏曰昭三年鄭子太

叔云文襄之伯也令諸侯三歲而聘五歲而朝自襄以後晉德少衰諸侯朝聘無復定準今晉悼復修伯業更合諸侯故公朝晉而稟其多少如公朝者蓋亦非一晉侯謙不敢在國約束故出外合之又難煩諸侯使大夫聽命故為邢丘之會以命朝聘之數耳其數蓋亦同文襄也汪氏克寬曰襄公嗣位甫及八年而三朝於晉自宣公媚齊之外春秋事霸之禮未若有若是其勤也晉悼立未十年而魯君四朝豈非倍於諸侯事天子五年一朝之制乎悼公改命朝聘之數其亦知過矣

夏葬鄭僖公

案鄭伯被弑經既從赴而書卒則自當書葬

附錄左傳

鄭羣公子以僖公之死也謀子駟子駟先之夏四月庚辰辟殺子狐子熙子侯子丁

孫擊孫惡出奔衛

鄭人侵蔡獲蔡公子燮

燮殺作溫後同

左傳

庚寅鄭子國子耳侵蔡獲蔡司馬公子燮鄭人皆喜唯子產不順曰小國無文德而有武功禍

莫大焉楚人未討能勿從乎從之晉師必至晉楚伐鄭自今鄭國不四五年弗得寧矣子國怒之曰爾何

知國有大命而有正卿童子言焉將為戮矣

公羊

此侵也其言獲何侵而言獲者適得之也

穀梁

人微者也侵淺事也而獲公子公子病矣

集說

杜氏預曰鄭侵蔡欲以求媚於晉既無晉令又無直辭主少興師動而無謀以生國患故敗之

稱人王氏洽曰鄭欲從楚故侵蔡以致楚然後告絕於晉而與楚平春秋惡之故稱人以示貶高氏

閔曰師未嘗敗績而遽獲其大夫有以見民不親上而委之於敵矣張氏洽曰僖公方葬楚方睥睨鄭

人之不服而欲討之今乃不能遠圖先侵蔡以挑楚故書人以貶之黃氏震曰鄭侵楚之與國以挑楚

此子產所以獨憂而不旋踵致楚之師季氏本曰鄭人恃晉侵蔡而獲其公子所謂不修文德而有武

功者也蔡楚之與國也能無致楚之討乎子耳子國之為政於是乎失謀矣

季孫宿會晉侯鄭伯齊人宋人衛人邾人于邢丘

左傳

五月甲辰會于邢丘以命朝聘之數使諸侯之大夫聽命季孫宿齊高厚宋向戌衛甯殖邾大

夫會之鄭伯獻捷於會故親聽命大夫不書尊晉侯也

穀梁

見魯之失正也公在而大夫會也

胡傳

大夫稱人貶之也昔周公戒成王以繼自今我其立政立事夫不自為政而委於臣下是以國

之利器示人而不知寶也朝聘事之大者重煩諸侯而使大夫聽命無乃以姑息愛人而不由德乎使政在大夫而諸侯失國又豈所以愛之也後此八年吳梁之會悼公初沒諸侯皆在而大夫獨盟君若贅旒夫豈一朝一夕之故哉故邢丘之事魯公在晉而季孫宿會見魯之失政也諸侯之大夫貶而稱人謹其始也

集說

杜氏預曰時公在晉晉悼難勞諸侯唯使大夫聽命故季孫在會而公先歸孔氏穎達曰公

以正月如晉此會之下始云公至則晉侯適會公乃歸魯季孫蓋從公朝晉即從晉赴會杜氏諤曰獨書季孫宿者春秋以內魯為文書季孫宿則知四國皆大夫也陳氏傳良曰此齊高厚宋向戌衛甯殖也其稱人何不以大夫敵盟主也不以大夫敵盟主桓文之盛也自同盟于戚而大夫與諸侯序矣於是再見其再見何復予晉以伯也傳曰大夫不書尊晉侯也張氏洽曰春秋之法必辨等列以大夫而會諸侯必人之者所以嚴君臣之分謹上下之交而革伯者苟且之政也李氏廉曰此條左氏得其事胡氏得其義論其事則不欲煩諸侯者晉侯之美意也論其義則不可委大夫者春秋之深意也左氏所謂尊晉侯者不過不以大夫敵諸侯之義耳卓氏爾康曰邢丘之會以命朝聘胡傳以重煩諸侯而使大

夫聽命是謂姑息愛人非也此正悼公之以謹嚴馭衆也諸侯與國為我敵體惟大夫可以命令之君指擣臣攝伏聽則與違則執我法可行彼勢可受不失尊重之常又於政體甚便雖以魯襄在晉特不令其與會也不令魯襄與會者優之也

案邢立之會重煩諸侯而使大夫聽命胡傳謂姑息愛人不自為政而委於臣下者防微之論也悼公霸業修舉豈有權移於下之事卓氏爾康謂馭衆謹嚴正在於此其說亦通今竝存之穀梁謂公在而大夫會杜注孔疏皆同蓋季孫從公朝晉遂由晉而赴邢丘耳經於會後始書公至則季孫往會之時公尚在晉也劉氏敞謂公已反而復遣季孫似未可信

公至自晉

莒人伐我東鄙

左傳

莒人伐我東鄙以疆鄆田

集說

高氏閌曰鄆田接於魯而疆界不明故興兵伐魯以正之鄆遂屬於莒矣張氏洽曰莒人滅

鄆

而魯不敢爭伯主不討所以興兵伐魯疆鄆田也王氏樵曰案莒滅鄆伐魯以疆鄆田其為奸齊盟

大矣而伯討不及晉方慮楚故也據此則莒以兵滅鄆明矣孰謂以其子後鄆為滅鄆耶

秋九月大雩

左傳

秋九月大雩旱也

冬楚公子貞帥師伐鄭

左傳

冬楚子囊伐鄭討其侵蔡也子駟子國子耳欲從楚子孔子矯子展欲待晉子駟曰周詩有之

曰俟河之清人壽幾何兆云詢多職競作羅謀之多族民之多違事滋無成民急矣姑從楚以紓吾民晉師至吾又從之敬共幣帛以待來者小國之道也犧牲玉帛待於二境以待彊者而庇民焉寇不為害民不罷病不亦可乎子展曰小所以事大信也小國無信兵亂日至亡無日矣五會之信今將背之雖楚救我將安用之親我無成鄙我是欲不可從也不如待晉晉君方明四軍無闕八鄉和睦必不棄鄭楚師遠遠糧食將盡必將速歸何患焉舍之聞之杖莫如信完守以老楚杖信以待晉不亦可乎子駟曰詩云謀夫孔多是用不得於道請從楚驂也受其咎乃及楚平使謀是用不得於道請從楚驂也受其咎乃及楚平使王子伯駢告於晉曰君命敝邑修而車賦儼而師徒以討亂略蔡人不從敝邑之人不敢寧處悉索敝賦

以討於蔡獲司馬燮獻于邢丘今楚來討曰女何故稱兵於蔡焚我郊保馮陵我城郭敝邑之衆夫婦男女不遑啓處以相救也翦焉傾覆無所控告民死亡者非其父兄即其子弟夫人愁痛不知所庇民知窮困而受盟於楚孤也與其二三臣不能禁止不敢不告知武子使行人子員對之曰君有楚命亦不使一介行李告於寡君將帥諸侯以見於楚君之所欲也誰敢違君寡君將帥諸侯以見於城下唯君圖之

胡傳

齊宣王問於孟子交鄰國有道乎孟子曰有惟智者為能以小事大故太王事獯鬻句踐事吳

以小事大畏天者也畏天者保其國鄭介大國之間困彊楚之令而欲息肩於晉若能信任仁賢明其刑政經畫財賦以禮法自守而親比四鄰必能保其封境荆楚雖大何畏焉而子耳子國加兵於蔡獲公子燮無故怒楚所謂不修文德而有武功者也楚人來討不從則力不能敵從之則晉師必至故國人皆喜

而子產獨不順焉以晉楚之爭鄭自茲弗得寧矣是以獲公子變特書侵蔡以罪之而公子貞來伐鄭及楚平不復書矣平而不書以見鄭之屈服於楚而不信也犧牲玉帛待於境上以待彊者而請盟其能國乎

集說

高氏閔曰觀左氏所載則子駟之弑僖公志在事楚矣家氏鉉翁曰鄭侵蔡以自結於晉然

從楚者本謀也楚至而服惟恐其後矣李氏廉曰此鄭又從楚之始也至十一年蕭魚始從晉汪氏克寬曰自襄元年荆楚侵宋伐陳圍陳伐鄭皆書大夫之名氏書帥師而無貶辭所謂不待貶絕而罪惡見者也

晉侯使士匄來聘

左傳

晉范宣子來聘且拜公之辱告將用師於鄭公享之宣子賦標有梅季武子曰誰敢哉今譬於

草木寡君在君君之臭味也歡以承命何時之有武子賦角弓賓將出武子賦彤弓宣子曰城濮之役我先君文公獻功於衡雍受彤弓於襄王以為子孫藏句也先君守官之嗣也敢不承命君子以為知禮

集說

李氏廉曰此與士燮來聘言伐鄭同汪氏克寬曰成公末年與士燮來聘言伐鄭同汪氏克

四聘於魯則晉之所以結與國者不亦厚乎宜悼公之所以得諸侯也

丁酉

靈王九年

晉悼九年齊靈十八年衛獻十三年蔡景公十八年鄭簡二年曹成十四年陳哀五

年杞考三年宋平十二年秦景十三年楚共二十七年吳壽夢二十二年

春宋災

災公作火

左傳

九年春宋災樂喜為司城以為政使伯氏司里

器量輕重蓄水潦積土塗巡丈城繕守備表大道使

華臣具正徒令隧正納郊保奔火所使華閱討右官

官庀其司向戌討左亦如之使樂過庀刑器亦如之

使皇鄭命校正出馬工正出車備甲兵庀武守使西

鉏吾庀府守令司宮巷伯徹宮二師令四鄉正敬享

祝宗用馬於四墉祀盤庚於西門之外晉侯問於士

弱曰吾聞之宋災於是乎知有天道何故對曰古之

火正或食於心或食於味以出內火是故味為鷄火

心為大火陶唐氏之火正閼伯居商丘祀大火而火

紀時焉相土因之故商主大火商人閱其禍敗之釁

必始於火是以日知其有天道也公曰

可必乎對曰在道國亂無象不可知也

集說

杜氏預曰天火曰災來告故書劉氏敞曰九年宗災殺梁曰外災不志此其志何也故宋也

非也齊大災又豈故齊乎高氏閭曰宋自昭文以來亂敗相屬三書宋災見人事之不修也李氏廉曰公羊以為為王者之後記災也穀梁以為故宋也范氏以宋者孔子之先也左氏以為來告故書也左氏得之左氏載宋司城樂喜救災之政纖悉備具又載晉侯士弱之問對則其來告必矣案宋災書者宋來告也當以杜氏預為正公穀以為外災不書者非也至謂宋為王者之後孔子之先故書其災則鑿矣昭十八年衛陳鄭與宋同日而災果如公穀之言春秋獨書宋可也何以合四國備書之乎

夏季孫宿如晉

左傳

夏季武子如晉
報宣子之聘也

集說

高氏閼曰公朝晉而晉來聘又使報焉事大國之禮勤矣

五月辛酉夫人姜氏薨

左傳

穆姜薨於東宮始往而筮之遇艮之八史曰是謂艮之隨隨其出也君必速出姜曰亡是於周

易曰隨元亨利貞无咎元體之長也亨嘉之會也利義之和也貞事之幹也體仁足以長人嘉會足以合禮利物足以和義貞固足以幹事然故不可誣也是以雖隨无咎今我婦人而與於亂固在下位而有不利不可謂元不靖國家不可謂亨作而害身不可謂利棄位而姦不可謂貞有四德者隨而无咎我皆無之豈隨也哉我則取惡能無咎乎必死於此弗得出矣

集說

杜氏預曰成公母淫僑如欲廢成公故徙居東宮

附錄左傳

秦景公使士雅乞師於楚將以伐晉楚子許之子囊曰不可當今吾不能與晉爭晉

君類能而使之舉不失選官不易方其卿讓於善其大夫不失守其士競於教其庶人力於農穡商工阜隸不知遷業韓厥老矣知瑩稟馬以為政范匄少於中行偃而上之使佐中軍韓起少於欒黶而欒黶士魴上之使佐上軍魏絳多功以趙武為賢而為之佐君明臣忠上讓下競當是時也晉不可敵事之而後可君其圖之王曰吾既許之矣雖不及晉必將出師秋楚子師於武城以為秦援秦人侵晉晉饑弗能報也

秋八月癸未葬我小君穆姜

公作繆姜

集說

杜氏預曰四月而葬速劉氏敞曰穆姜者何成公之母也高氏閻曰別為之謚用文姜之

例也 家氏鉉翁曰穆姜為行父所幽以死魯國之大無有如穎考叔之悟其君者畏季氏也行父取穆姜喪具以葬齊姜其心可誅矣

冬公會晉侯宋公衛侯曹伯莒子邾子滕子薛伯杞伯

小邾子齊世子光伐鄭十有二月己亥同盟于戲

戲許宜戲反

戲杜注鄭地成十七年諸侯伐鄭自戲童至於曲洧即此也

左傳

冬十月諸侯伐鄭庚午季武子齊崔杼宋皇鄭從荀罃士匄門於鄭門衛北宮括曹人邾人從

荀偃韓起門於師之梁滕人薛人從欒黶士魴門於北門杞人鄭人從趙武魏絳斬行栗甲戌師于汜令於諸侯曰修器械盛饌糧歸老幼居疾於虎牢肆眚圍鄭鄭人恐乃行成中行獻子曰遂圍之以待楚人

之救也而與之戰不然無成知武子曰許之盟而還
師以敝楚人吾三分四軍與諸侯之銳以逆來者於
我未病楚不能矣猶愈於戰暴骨以逞不可以爭大
勞未艾君子勞心小人勞力先王之制也諸侯皆不
欲戰乃許鄭成十一月己亥同盟于戲鄭服也將盟
鄭六卿公子騑公子發公子嘉公孫輒公孫蠆公孫
舍之及其大夫門子皆從鄭伯晉士莊子為載書曰
自今日既盟之後鄭國而不唯晉命是聽而或有異
志者有如此盟公子騑趨進曰天禍鄭國使介居二
大國之間大國不加德音而亂以要之使其鬼神不
獲歆其禋祀其民人不獲享其土利夫婦辛苦墊隘
無所底告自今日既盟之後鄭國而不惟有禮與殫
可以庇民者是從而敢有異志者亦如之荀偃曰改
載書公孫舍之曰昭大神要言焉若可改也大國亦
可叛也知武子謂獻子曰我實不德而要人以盟豈
禮也哉非禮何以主盟姑盟而退修德息師而來終

必獲鄭何必今日我之不德民將棄我豈惟鄭若能
休和遠人將至何恃於鄭乃盟而還晉人不得志於
鄭以諸侯復伐之十二月癸亥門其三門閏月戊寅
濟於陰阪侵鄭次於陰口而還子孔曰晉師可擊也
師老而勞且有歸志必
大克之子展曰不可

汜杜注鄭地東汜陰阪杜
注洧津陰口杜注鄭地

穀梁

不異言鄭善得鄭也
不致恥不能據鄭也

胡傳

善為國者不師善師者不陣善陣者不戰知武
子明於善陣之法以佐晉悼公屢與諸侯伐鄭

楚輒救之而不與之戰楚師遂屈得善
勝之道矣故下書蕭魚之會以美之

集說

杜氏預曰伐鄭而書同盟則鄭受盟可知傳言
十有二月己亥以長厯推之十二月無己亥經

誤又曰此年不得有閏月戊寅戊寅是十二月二十
日疑閏月當為門五日晉人三番四軍更攻鄭門晉
各一攻鄭三受敵癸亥去戊寅十六日以癸亥始攻
攻輒五日凡十五日鄭故不服而去明日戊寅濟於
陰阪復侵鄭外邑呂氏大圭曰案左氏同盟于戲
鄭與焉然柯陵之盟亦書於伐鄭之後則鄭服未可
知今以經考之盟柯陵之後諸侯再伐鄭則其未得
志於鄭可知盟戲之後楚子伐鄭則為鄭服可知十
一年同盟亳城北此亦鄭受盟也會于蕭魚亦鄭與
會也皆書於伐鄭之後比事而觀可見矣李氏廉
曰此盟在五會之後三駕之前晉方失陳北方之勢
未振鄭又侵蔡楚人之辭稍直故士匄告用師諸侯
不欲戰則內外之心必皆有疑怠矣盟而書同雖曰
同心外楚而其實著其反覆也獨幸五會之信在人
心者未忘而荀瑩又得善勝之道悼公既歸修德息
民於是成三駕之績焉則此盟乃晉楚盛衰之

機括也與汪氏克寬曰齊桓之時在於服楚晉文之時在於勝楚晉悼之時在於敵楚蓋召陵以前楚人加兵於鄭及次陘之伐屈完來盟而鄭無楚患矣城濮之前楚滅黃而霸主不能恤敗徐而諸大夫不能救執盟主而在會者不敢與之爭既又成穀逼齊合兵圍宋威動天下及得臣敗績而楚顏懾服矣迨夫晉師敗郟之後楚復陵駕北方既縣陳入鄭又滅蕭圍宋于蜀之會奄然以大夫主盟諸侯而聽命者十有一國卒之保鄭以為已有厲公敗之於鄆陵三假王命以伐鄭而終不服悼公復伯鄭與於五會之信而猶叛焉悼公欲直擣方城漢水之境繼齊桓帖荆之績則楚浸彊盛未肯服義而昔者處父之伐不足以及屈其力也欲與之決勝復文公館穀之捷則暴骨以逞克不可命而先君鄆陵之勝不足以服其心也於是數伐鄭而不與楚戰使楚人疲於奔命而莫能爭鄭既有以挫其暴狼之鋒又有以摧其憑陵之

志桓文以降於斯為盛故于戲毫北雖書同盟以惡鄭之反覆而會于蕭魚特筆以著其美也然悼公四駕伐鄭惟盟戲不致者因子駟之言而未得志於鄭是以不書至穀梁子所謂恥不能據鄭者是也亦猶會鄆謀陳不成救而不書至會耳悼公九合諸侯獨於于鄆于戲不致春秋豈無意哉

附錄左傳

公送晉侯晉侯以公宴於河上問公年李武子對曰會于沙隨之歲寡君以生晉侯

曰十二年矣是謂一終一星終也國君十五而生子冠而生子禮也君可以冠矣大夫盍為冠具武子對曰君冠必以裸享之禮行之以金石之樂節之以先君之祧處之今寡君在行未可具也請及兄弟之國而假備焉晉侯曰諾公還及衛冠於成公之廟假鐘磬焉禮也

楚子伐鄭

左傳

楚子伐鄭子駟將及楚平子孔子矯曰與大國盟口血未乾而背之可乎子駟子展曰吾盟固

云惟彊是從今楚師至晉不我救則楚彊矣盟誓之言豈敢背之且要盟無質神弗臨也所臨唯信信者言之瑞也善之主也是故臨之明神不觸要盟背之可也乃及楚平公子罷戎入盟同盟於中分楚莊夫人卒王未能定鄭而歸

中分杜注鄭城
中里名

集說


趙氏鵬飛曰楚子伐鄭鄭復為楚故祖之會鄭不在焉汪氏克寬曰楚書子者國君自將恃

彊軋弱憑陵列國之稱也不書鄭及楚平不書盟不與鄭之從楚也明年諸侯伐鄭則鄭與楚可知矣

附錄左傳

晉侯歸謀所以息民魏絳請施舍輸積聚以貸自公以下苟有積者盡出之國無滯

積亦無困人公無禁利亦無貪民所以幣更賔以特
壯器用不作車服從給行之期年國乃有節三駕而
與爭楚不能



欽定春秋傳說彙纂卷二十五

欽定四庫全書

經部

欽定春秋傳說彙纂卷二十六

詳校官監察御史

臣

陳化龍

給事中

臣溫常綏覆勘

總校官進士

臣繆

琪

校對官中書

臣陳

林

謄錄監生

臣潘

衡

欽定四庫全書

欽定春秋傳說彙纂卷二十六

戊靈王十年晉悼十年齊靈十九年衛獻十四年蔡景
成九年二十九年鄭簡三年曹成十五年陳哀六

年杞孝四年宋平十三年秦景十四
年楚共二十八年吳壽夢二十三年

春公會晉侯宋公衛侯曹伯莒子邾子滕子薛伯杞伯

小邾子齊世子光會吳子祖莊加反祖杜注楚地

是也

左傳十年春會于祖會吳子壽夢也三月癸丑齊高
厚相太子光以先會諸侯於鍾離不敬士莊子

曰高子相太子以會諸侯將社稷是衛而皆不敬棄社稷也其將不免乎夏四月戊午會于祖

集說

杜氏預曰吳子在祖晉以諸侯往會之故曰會吳劉氏敞曰杜云吳不稱子從所稱也非也

吳子豈自稱吳而已乎凡吳子鄭伯之類亦皆人稱之爾非其君自稱也且若從其所稱而稱之乎則吳當稱王楚亦當稱王必不但曰吳也穀梁曰會又會外之也非也會于戚吳人亦在何不外之乎會于申淮夷亦在何不外之乎蘇氏轍曰特書會吳以吳為會故也趙氏鵬飛曰晉率十二諸侯會吳於楚地謀楚也謀楚則未嘗伐楚何以知其謀蓋謀制楚以服鄭而已不志於伐也晉楚爭鄭久矣前日伐鄭鄭既同盟而復叛以楚兵逼之也楚兵不出則鄭可久安故晉侯會吳于祖以示晉已得吳吳將援晉而倚楚楚謀出兵則懼吳襲其後而內有所忌然後晉得以服鄭鄭得以從晉而無楚患也卓氏爾康曰

合十二國以會壽夢而於楚界示楚以得吳也晉得吳則楚右臂斷不敢議鄭議鄭則恐吳之據其後也其後蕭魚之會卒得鄭不叛者二十年吳倚楚楚不敢伐鄭也雖然晉悼虎牢之城先識地勢扼鄭咽喉自戲盟之役三分四軍以待來者是故楚疲晉逸三駕而不可爭鄭子展曰晉君方明必不棄鄭楚之柄臣如子囊者亦曰晉不可敵事之而後可豈獨以祖會吳之故哉張氏溥曰荆楚地大人悍專與伯爭當日諸侯能敵之者齊晉秦三大國齊自桓公薨後國亂君弱不敢專兵伐楚秦以散戰讐晉連歲構師反與楚合晉獨力制楚秦又乘之雖城濮餘威馭陵新敗楚無懼志虐宋役鄭惟所欲為晉雖欲起而服之未有隙也吳居肘腋之下盛氣方厲臣啟謀楚疲奔命鳩茲庸浦之間干戈日見晉一通吳吳益致銳於楚師不出則擾其旁出則議其後楚畏吳偏無暇與晉校晉始得息鄰睦交屢舉盟會收宋陳伐秦

鄭坐享霸功是故晉三會吳專以楚故權事濟變非得已也晉文之時能克楚者齊秦而樂為晉用文公因之集二國之師于城濮一戰而勝晉悼之時能克楚者吳而未必即為晉用悼公惟招之同會不用吳師而楚人自屈此悼公之知權也陳氏際泰曰悼公三駕吳未始與焉然于善道于戚于祖其中好不一而足也夫豈無所用也吾謂此即齊桓遠結江黃之遺智也而吳竟未嘗亡一天遺一鍼吾謂此即江黃黃按兵不動遙相犄角之遺智也

案晉悼之時楚氛方熾晉合諸侯以攘之猶懼不足以集事於是通吳以為犄角之勢及鄭已服晉而楚不敢爭則晉不復恃吳矣故吳伐楚喪范宣子數其不德以退之蓋用吳而不肯為吳用晉之君臣早有成算說者必以會吳為悼公伯業之累不亦過乎

夏五月甲午遂滅偃陽

偃音福又彼力反穀作傳 偃陽杜注彭城傳陽縣也章懷太

子曰偃陽故城在永縣南今在兖州府嶧縣南五十里

左傳

晉荀偃士句請伐偃陽而封宋向戌馬荀瑩曰城小而固勝之不武弗勝為笑固請丙寅圍之

弗克孟氏之臣秦董父輦重如役偃陽人啟門諸侯之士門焉縣門發聊人紇挾之以出門者狄虎彌建大車之輪而蒙之以甲以為櫓左執之右拔戟以成一隊孟獻子曰詩所謂有力如虎者也主人縣布董父登之及堞而絕之隊則又縣之蘇而復上者三主人辭焉乃退帶其斷以徇於軍三日諸侯之師久於偃陽荀偃士句請於荀瑩曰水潦將降懼不能歸請班師知伯怒投之以机出於其間曰女成二事而後告余余恐亂命以不女違女既勤君而興諸侯率帥老夫以至於此既無武守而又欲易余罪曰是實班

師不然克矣余羸老也可重任乎七日不克必爾乎
取之五月庚寅荀偃士句帥卒攻偃陽親受矢石甲
午滅之書曰遂滅偃陽言自會也以與向戌向戌辭
曰君若猶辱鎮撫宋國而以偃陽光啟寡君羣臣安
矣其何貺如之若專賜臣是臣與諸侯以自封也其
何罪大焉敢以死請乃予宋公宋公享晉侯於楚丘
請以桑林荀偃辭荀偃士句曰諸侯宋魯於是觀禮
魯有禘樂賓祭用之宋以桑林享君不亦可乎舞師
題以旌夏晉侯懼而退入於房去旌卒享而還及著
雍疾卜桑林見荀偃士句欲奔請禱焉荀偃不可曰
我辭禮矣彼則以之猶有鬼神於彼加之晉侯有間
以偃陽子歸獻於武宮謂之夷俘偃陽姁姓也使周
內史選其族嗣納諸霍人禮也師歸孟
獻子以秦董父為右生秦玉茲事仲尼

聊杜注聊邑魯縣東南莖城
是也霍人杜注霍晉邑

穀梁

遂直

集說

杜氏預曰因祖會而滅之故曰遂劉氏敞曰

偏陽者何姁姓之國也其言遂滅之何諸侯會而滅人之國非禮也諸侯與有貶焉左氏曰使周內史選其族姓納諸霍人禮也夫偏陽子竟何罪乎欲取其國以封向戌耳既已擅滅諸侯又擅以其地予人罪孰大焉謂之禮何哉即以選其族姓納諸霍人為禮諸侯誰不樂滅國乎苟滅國矣取其子孫償以一邑誰不樂為此乎孫氏覺曰晉因諸侯而為利名恤災救患而實自封殖者也高氏閔曰偏陽楚與國也汪氏克寬曰偏陽國及祖地皆在沛縣乃吳入北方之要衝則悼公之會吳于祖蓋謀滅偏陽而通吳也齊桓之霸滅譚滅遂降鄣遷陽晉文之霸執曹伯逐衛侯悼公之霸滅偏陽皆功不掩過此孟子所以謂五霸者三王之罪人也

公至自會

集說

王氏葆曰此致前事者二事偶舉其可道者也
會吳猶可會吳而滅人之國其惡甚矣故以會

致焉

高氏攀龍曰不致
滅而致會舉其可道者也

楚公子貞鄭公孫輒帥師伐宋

左傳

六月楚子囊鄭子耳伐宋師
於訾母庚午圍宋門於桐門

訾母

杜注宋地當在

歸德府鹿邑縣境

集說

高氏閔曰以宋公受偪陽故也
陳氏傅良曰凡專將言帥師苟二國會則先序主兵者而不

言帥師言帥師是國自為帥也國自為帥自楚公子
貞鄭公孫輒始自是雖圍滅亦並稱帥師矣
李氏

廉曰鄭之從楚連兵以伐宋一見於宣之元年再見於成之十八年三見於此年四見於明年

晉師伐秦

左傳

晉荀罃伐秦報其侵也

集說高氏攀龍曰去年秦人侵晉晉饑不能報至是伐之是時秦人南交於楚而秦景妹又為楚共

王夫人

附錄左傳

衛侯救宋師於襄牛鄭子展曰必伐衛不然是不與楚也得罪於晉又得罪於楚國

將若之何子駟曰國病矣子展曰得罪於二大國必亡病不猶愈於亡乎諸大夫皆以為然故鄭皇耳帥師侵衛楚令也孫文子卜追之獻兆於定姜姜氏問繇曰兆如山陵有夫出征而喪其雄姜氏曰征者喪

雄禦寇之利也大夫圖之衛人追之孫蒯獲鄭皇耳
於犬丘秋七月楚子囊鄭子耳伐我西鄙還圍蕭八
月丙寅克之九月子耳侵宋北鄙孟獻子曰鄭其有
災乎師競已甚周猶不堪競况鄭乎有災其執政之
三士
手

秋莒人伐我東鄙

左傳

莒人間諸侯之有事也故伐我東鄙

集說

汪氏克寬曰莒屢同晉悼之盟而乘間加兵於魯其無忌憚亦甚矣

公會晉侯宋公衛侯曹伯莒子邾子齊世子光滕子薛

伯杞伯小邾子伐鄭

此三駕之一

左傳

諸侯伐鄭齊崔杼使太子光先至於師故長於滕已酉師於牛首

集說

杜氏預曰齊世子光先至於師為盟主所尊故在滕上孔氏穎達曰周禮典命諸侯之適子

誓於天子攝其君則下其君之禮一等未誓則以皮帛繼子男十九年傳云光之立也列於諸侯矣則光是未誓者也法當繼於子男之下祖之會列於小邾之下是其正也於此伐也傳稱崔杼使太子光先至於師故長於滕晉悼以齊是大國光復先至心善其共遂進其班為盟主所尊故在滕上言其非正法也

呂氏大圭曰齊世子光序諸侯上主會者為之也春秋不改所以示譏言專以彊弱事勢為先後也

趙氏鵬飛曰楚鄭伐宋故晉侯率諸侯伐鄭鄭不服於是戌虎牢汪氏克寬曰齊世子光同盟雞澤會

戚救陳盟戲會桓皆序小邾子之下惟此年伐鄭序滕薛杞小邾子之上而傳稱光先至於師明年兩伐

鄭又序莒邦之上傳亦云齊太子光宋向戌先至於鄭杜氏皆云為盟主所尊故進之夫諸侯之世子誓於天子而攝其君者下其君之禮一等則侯國世子宜次於伯爵之君之下齊光未誓於天子而可序於薛伯杞伯之上乎成十五年宋世子成序齊大夫之上昭四年宋世子佐序小邾子之下以上公世子而次於子爵是則世子未誓於天子以皮幣繼子男之常制也齊光序諸侯之上是晉悼以私意之向背謂莒邦薛杞國弱而卑齊光國大而彊故素周班而進之也况自晉悼之伯莒邦以子爵而常在薛伯杞伯之上則班爵之等又安可以先王舊制論之哉據事直書義自見矣

冬盜殺鄭公子騂公子發公孫輒

騂公穀作斐書盜始此

左傳

初子騂與尉止有爭將禦諸侯之師而黜其車尉止獲又與之爭子騂抑尉止曰爾車非禮也

遂弗使獻初子駟為田洹司氏堵氏侯氏子師氏皆
喪田焉故五族聚羣不逞之人因公子之徒以作亂
於是子駟當國子國為司馬子耳為司空子孔為司
徒冬十月戊辰尉止司臣侯晉堵女父子師僕帥賊
以入晨攻執政於西宮之朝殺子駟子國子耳刳鄭
伯以如北宮子孔知之故不死書曰盜言無大夫馬
子西閒盜不徹而出尸而追盜盜入於北宮乃歸授
甲臣妾多逃器用多喪子產聞盜為門者庀羣司閒
府庫慎閉藏完守備成列而後出兵車十七乘尸而
攻盜於北宮子驍帥國人助之殺尉止子師僕盜衆
盡死侯晉奔晉堵女父司臣尉翩司齊奔宋子孔當
國為載書以位序聽政辟大夫諸司門子弗順將誅
之子產止之請為之焚書子孔不可曰為書以定國
衆怒而焚之是衆為政也國不亦難乎子產曰衆怒
難犯專欲難成合二難以安國危之道也不如焚書
以安衆子得所欲衆亦得安不亦可乎專欲無成犯

衆與禍子必從之乃焚書
於倉門之外衆而後定

集說

杜氏預曰非國討當兩稱名氏殺者非卿故稱盜以盜為文故不得言其大夫孔氏穎達曰

若國家討而殺之則舉國名言殺其大夫若非國討兩下相殺則兩書名氏王札子殺召伯毛伯是也此非國討亦當兩書名氏但殺之者尉止司臣之徒皆非卿也非卿則名氏不合見經故稱之為盜凡言其者是其所有也君是臣之君故書弑其君臣是君之臣故書殺其大夫盜者寇賊之名賤之不繫於國被殺者非盜之所有既以盜為文故不得言其大夫孫氏復曰盜者微賤之稱盜一日而殺三卿故列數之惡鄭伯失刑政也劉氏敞曰穀梁曰稱盜以殺大夫弗以上下道惡上也非也若以盜者指其君乎殺其臣而謂之盜是不正名也若以盜者固盜賊乎稱盜乃宜矣又何云弗以上下道也如穀梁之意以

上下道則曰盜殺其大夫乎則是大夫為盜之臣盜為大夫之君乃可耳 胡氏銓曰盜乘釁而至者也苟無釁隙盜豈敢犯哉三子者不能佐時憂國日尋干戈何異負販小人而乘君子之器乎如此則盜之招也殺之何悔哉 王氏葆曰易曰小人而乘君子之器盜思奪之矣上慢下暴盜思伐之矣鄭三卿之禍其近是乎 高氏閼曰為大夫而見殺於盜則其所以人在人上者可知也 張氏洽曰鄭之從楚以勞列國皆公子騂之罪也鄭成公卒之初諸大夫欲從晉矣公子騂以官命未改止之及鄆之役僖公如會以從盟主而騂弑之及楚子囊伐鄭子展欲堅守以待晉而騂請從楚以任其咎故公子騂者弑君之賊也而公子發公孫輒惟騂是從惡積而不可掩鄭不能討而盜得殺之所謂上慢下暴而致寇至孔子以為盜之招也

案鄭三卿之死經書盜殺胡傳本程子說以為失卿職者非也身為國卿而駢首受戮於盜則不能其職明矣何待削其大夫而始為當官失職者之戒乎杜注孔疏謂以盜為文故不得言其大夫於義為長

戍鄭虎牢楚公子貞帥師救鄭

左傳諸侯之師城虎牢而戍之晉師城梧及制士魴魏絳戍之書曰戍鄭虎牢非鄭地也言將歸焉鄭及晉平楚子囊救鄭十一月諸侯之師還鄭而南至於陽陵楚師不退知武子欲退曰今我逃楚楚必驕驕則可與戰矣樂廩曰逃楚晉之恥也合諸侯以益恥不如死我將獨進師遂進己亥與楚師夾潁而軍子矯曰諸侯既有成行必不戰矣從之將退不從亦退退楚必圍我猶將退也不如從楚亦以退之宵涉潁與楚人盟樂廩欲伐鄭師荀瑩不可曰我實不能禦楚又不能庇鄭鄭何罪不如致怨焉而還今伐

其師楚必救之戰而不克為諸侯笑克不可命不如
還也丁未諸侯之師還侵鄭北鄙而歸楚人亦還

梧杜注鄭舊地也案隋書滎陽縣有梧桐澗疑即
梧也陽陵杜注鄭地今在河南開封府許州西
北

公羊孰戌之諸侯戌之曷為不言諸侯戌之離至不
可得而序故言我也諸侯已取之矣曷為繫之

鄭諸侯莫之主
有故反繫之鄭

集說劉氏敞曰此非鄭地矣曷為繫之鄭反之也曷
為反之不土其地正也不土其地則戌之何諸

侯以義反之矣而未入也又曰向者鄭虎牢也而不
言鄭不使鄭得專之意也今者非鄭虎牢也而繫之
鄭不取於鄭之意也故義可以取雖過千乘君子不
以為非義所不取雖已失之猶予使得名焉取之以

義子之以義雖用天下可也況其下乎又曰穀梁曰其曰鄭虎牢決鄭乎虎牢也非也城人之邑戍人之都勢必繫其國而言有不繫其國者乃變例也如其繫國矣此乃常文又何決哉蘇氏轍曰諸侯既城虎牢非鄭地矣而繫之鄭諸侯將服鄭而歸之故致其意也鄭之虎牢宋之彭城一也陳氏傅良曰向也曰虎牢今也曰鄭虎牢何不繫之鄭者為天下城之也繫之鄭者為鄭戍之也是故楚丘不繫之衛緣陵不繫之杞梁山沙鹿不繫之晉皆非一國之辭也邢邵邵繫之紀彭城繫之宋皆一國之辭也又曰楚數救鄭矣不書於是始書以為晉悼復伯楚欲救而不能也是故書救陳見晉之終失陳書救鄭見楚之終失鄭云爾趙氏鵬飛曰孰戍之伐鄭之諸侯戍之也說者以為魯獨戍之魯敢以單師抗楚哉家氏鉉翁曰胡文定謂春秋善楚之救殆不然也唐之叛將有乞援於外而抗其君者與諸侯乞援於楚何

異卽是而觀救之善不善判矣汪氏克寬曰前書
晉悼救陳而陳卒屬於楚此書楚救鄭而鄭遂服於
晉得鄭而棄陳悼公蓋惑於諸大夫之言以為陳近
於楚是以計近功而虧大義急於此而緩於彼也
季氏本曰楚本乎鄭春秋何嘗以救許楚乎紀其實
而已陳氏宗之曰左氏曰非鄭地也言將歸焉蓋
既欲駐師扼險以逼之亦欲兼斷荆楚之路為鄭屏
蔽鄭服則將歸焉德威並行以示懷納於鄭城而不
戍猶不城也楚來爭鄭徐合諸侯以救之無及於楚
而勦民猶不救也此戍虎牢之意也戍則當宿兵峙
糧據險退可守進可戰鄭服則保鄭以拒楚鄭貳則
我扼其要而制其肩胛南向足以禦楚而反向足以
臨鄭矣嚴氏啟隆曰諸侯伐鄭而鄭不下於是乎
頓兵虎牢為久駐計故亦曰戍非遣兵往戍之戍若
戍陳者比也戍之與圍其用不一圍則勞而戍則逸
是以我兵方戍而鄭即平昔日之城所以為今日之

戊地也晉師城梧及制梧與制皆虎牢之旁邑城之所以翼虎牢其事細故史不書是時晉之計主於擾鄭而使自服故進無逼之之兵亦主於肆楚而使自疲故遇亦無勝之之意

案胡傳謂虎牢繫鄭為罪諸侯非也既滅虎牢而不戍何貴乎城諸侯合兵以戍之所以庇鄭而抗楚三駕之績實本於此何罪之有焉又謂楚師救鄭春秋以救許楚亦非也此年書楚救鄭與僖二十八年書楚救衛義同蓋以見晉伯之方興而楚不能爭耳今故不主胡氏說

公至自伐鄭

集說

季氏本曰鄭雖未服而諸侯已戍虎牢則伐鄭之功也故以此飲至

附錄左傳

王叔陳生與伯輿爭政王右伯輿王叔陳生怒而出奔及河王復之段史狡以說焉

不入遂處之晉侯使士匄平王室王叔與伯輿訟馬
王叔之宰與伯輿之大夫瑕禽坐獄於王庭士匄聽
之王叔之宰曰鞏門閭竇之人而皆陵其上其難為
上矣瑕禽曰昔平王東遷吾七姓從王牲用備具王
賴之而賜之駢旄之盟曰世世無失職若鞏門閭竇
其能來東底乎且王何賴焉今自王叔之相也政以
賄成而刑放於寵官之師旅不勝其富吾能無鞏門
閭竇乎唯大國圖之下而無直則何謂正矣范宣子
曰天子所右寡君亦右之所左亦左之使王叔氏與
伯輿合要王叔氏不能舉其契王叔奔晉不書不告
也單靖公為卿
士以相王室

巳靈王
亥十年

十有一年

晉悼十一年齊靈二十年衛獻十五
年蔡景三十年鄭簡四年曹成十六

年陳哀七年杞孝五年宋平十四年秦景
十五年楚共二十九年吳壽夢二十四年

春王正月作三軍

左傳

十一年春季武子將作三軍告叔孫穆子曰請為三軍各征其軍穆子曰政將及子子必不能

武子固請之穆子曰然則盟諸乃盟諸僖闕誼諸五父之衢正月作三軍三分公室而各有其一三子各毀其乘季氏使其乘之人以其役邑入者無征不入者倍征孟氏使半為臣若子若弟叔孫氏使盡為臣不然不舍

胡傳

三軍魯之舊也古者大國三軍次國二軍小國一軍魯侯封於曲阜地方數百里天下莫強焉

及僖公時能復周公之宇而史克作頌其詩曰公車千乘說者以為大國之賦也又曰公徒三萬說者以為大國之軍也故知三軍魯之舊爾然車而謂之公車則臣下無私乘也徒而謂之公徒則臣下無私民

也若有侵伐諸卿更帥以出事畢則將歸於朝車復於甸甲散於丘卒還於邑將皆公家之臣兵皆公家之衆不相繫也文宣以來政在私門襄公幼弱季氏益張廢公室之三軍而三家各有其一季氏盡征焉而舊法亡矣是以謂之作其明年季孫宿救台遂入鄆又其後享范獻子而公臣不能具三耦民不屬公可知矣春秋書其作舍以見昭公失國定公無正而兵權不可去公室有天下國家者之所宜鑒也

集說

杜氏預曰魯本無中軍唯上下二軍皆屬於公

有事三卿更帥以征伐季氏欲專其民人故假立中軍因以改作孔氏穎達曰昭五年云舍中軍明此年作而彼年舍故知舊有二軍今增立中軍也然則止是作中軍耳而云作三軍者傳言三子各毀其乘則舊時屬己之乘毀之以足成三軍是舊軍盡廢而全改作之故云作三軍杜見其以二改三復據彼中軍之文故言增立中軍耳又曰禮明堂位云成

王封周公於曲阜地方七百里其時必有三軍也詩魯頌閟宮頌僖公能復周公之宇曰公徒三萬鄭康成云大國三軍合三萬七千五百人言三萬者舉成數也則僖公復古制亦三軍矣蓋自文公以來霸主之令軍多則貢事多自減為二軍耳非是魯衆不滿三軍也若然昭五年舍中軍書之於經往前若減一軍亦應書之而經不書者作三軍與舍中軍皆是變故改常卑弱公室季氏秉國權專擅改作故史特書之耳若國家自量彊弱其軍或減或益國史不須書也周禮小司徒云凡起徒役無過家一人是家出一人故鄉為一軍天子六軍出自六鄉則大國三軍出自三鄉其餘公邑采地之民不在三軍之數季武子今為三軍則異於是矣以魯國屬公之民皆分為三亦謂之三軍其軍之民不啻一萬二千五百家也何則魯國合竟之民屬公者豈唯有三萬七千五百家乎明其決不然矣由此言之此作三軍與禮之三軍

名同而實異也又曰三家所得各以父兄弟分爲
四季氏盡取四分叔孫氏取子弟而以父兄歸公孟
氏止取其子弟之半而以三歸公蓋分國民爲十二
三家得七公得五也趙氏匡曰公羊曰三卿也古
者上卿下卿上士下士案魯卿素已有四五不止三
也公羊此說適足令學者疑繆爾穀梁曰諸侯一軍
案國有小大軍制當異而但云一軍無等差之異必
無此理周禮萬二千五百人爲軍天子六軍大國三
軍次國二軍小國一軍據魯初封時最爲大國非一
軍明矣孫氏覺曰蓋三桓欲弱公室彊私家不量
其力之可否而頓作一軍春秋以爲亂王制竭民力
書曰作三軍也陳氏傅良曰於是季武子作三軍
非公命也向也新作南門非公命不書此何以書作
南門常事作三軍非常也是故必常事譏不及公則
不書苟非常則謹書之書作三軍志三家之分公室
也立武宮立煬宮雖非公命皆非常也家氏鉉翁

曰析二軍以為三而三家各有其一為國君者僅擁
虛器於上國非其國乾侯之禍權輿於此春秋書城
費於前書作三軍於後所以垂人臣負固跋扈之戒
李氏康曰此條其制國分民之說左氏得之而正
義尤詳胡氏張氏諸家多從之但杜氏以為魯舊二
軍今增立中軍為三軍胡氏以為魯本有三軍今不
過廢公室之三軍而三家各有其一故謂之作耳此
處小不合然疏又曰成王封周公時必有三軍後以
軍多貢重故自減為二軍耳非是魯眾不滿三軍也
若如此說則亦無礙於胡氏之義矣汪氏克寬曰
費誓稱魯人三郊三遂說者謂大國三軍故三郊三
遂則魯舊有三軍明矣然春秋書作三軍蓋是時軍
政隳壞而公室之三軍不能備王制之舊是以季氏
借改作之名而專兵權也聖人不以作三軍繫之三
家者其意曰魯國雖失兵權而聖王之大法則不使
兵權不在公室也經凡書作者不宜作也如作丘甲

作南門作雉門兩觀皆譏也三軍魯之舊制而亦書作學者習其讀而問其傳則知罪之在矣王氏錫爵曰此魯民不屬公之始陳氏宗之曰增立中軍則正是作中軍耳而云作三軍者舊軍盡廢而全改作之故云作三軍也往前民皆屬公國家自有二軍若非征伐不屬三子故三子自以采邑之民為己之私乘如子產出兵車十七乘之類是其私家車乘也今既三分公室所分得者即是已有不須更立私乘故三子各自毀壞舊時車乘部伍分以足成三軍也

案魯頌公徒三萬鄭箋以為舉成數而言費誓三郊三遂說者亦以為大國三軍故胡傳以三軍為魯之舊也考伯禽受封為東方之望國周公有大勲勞於天下得用天子禮樂則舊有三軍尚何疑乎杜氏預因昭五年舍中軍遂謂魯惟上下二軍李氏欲專其民人增立中軍蓋昭五年之所舍即此年之所立也

其說似非無據今主胡傳而杜注亦附存之

夏四月卜郊不從乃不郊

集說高氏閔曰魯不當郊郊非禮也今不郊者非知其非禮故也乃卜不從故耳直書不郊則不復免牲矣吳氏澂曰因四卜瀆以著魯郊之僭氏克寬曰僖三十一年亦四卜郊不從但書免牲不書不郊蓋免牲則不郊可知此云不郊則卜免牲不吉而不敢免也

鄭公孫舍之帥師侵宋

左傳鄭人患晉楚之故諸大夫曰不從晉國幾亡楚弱於晉晉不吾疾也晉疾楚將辟之何為而使晉師致死於我楚弗敢敵而後可固與也子展曰與宋為惡諸侯必至吾從之盟楚師至吾又從之則晉

怒甚矣晉能驟來楚將不能吾乃固與晉大夫說之使疆場之司惡於宋宋向戌侵鄭大獲子展曰師而伐宋可矣若我伐宋諸侯之伐我必疾吾乃聽命焉且告於楚楚師至吾又與之盟而重賂晉師乃免矣

夏鄭子展侵宋

集說

杜氏預曰欲以致諸侯鄭氏玉曰鄭諸大夫

既知楚弱於晉不從晉國幾亡即當勇於從晉堅於却楚而乃妄興大衆侵犯大國萬一事有不然輕則喪師重則覆國春秋書之見鄭之無謀罪其大夫之過舉也王氏樵曰案鄭之謀國有二犧牲玉帛待於二竟欲唯彊是從者子駟也晉君方明八卿和睦知必不棄鄭欲仗信以待晉者子展也至是子駟既亡子展遂堅於從晉然猶必侵宋以致諸侯之師使晉師驟來而後固與晉者蓋前此從晉則楚師至從楚則晉師至今故欲激使晉師致死於鄭楚弗

敢敵而後可固與也卒之晉師三駕而楚弗能與爭可謂如子展之言矣然而子展未知本也子展所見者晉楚之力耳兩疆則爭爭則難於兩與也一弱則吾與固矣此子展之見也然使鄭一於信義以從晉致死不二則以北方與國之多信好之重保鄭却楚有餘矣何至為是瀆武勞人以冀小定而僅給耶故為國在修德政以自彊敦信義以睦鄰而待人之彊有禮以為底幸敵之少懦以苟安者愚而已矣

公會晉侯宋公衛侯曹伯齊世子光莒子邾子滕子薛

伯杞伯小邾子伐鄭

此三駕之二

左傳

四月諸侯伐鄭己亥齊太子光宋向戌先至於鄭門於東門其莫晉荀罃至於西郊東侵舊許

衛孫林父侵其北鄙六月諸侯會於北林師於向
右還次於瑣圍鄭觀兵於南門西濟於濟隧

舊許杜注許之舊國鄭新邑案成十五年許遷于葉則許之舊國為鄭所有故謂之舊許向杜注地在潁川長社縣東北今開封府尉氏縣西南四十里有向城瑣杜注滎陽宛陵縣西有瑣侯亭今在河南開封府新鄭縣北濟隧杜注水名水經注濟水伏流自河而出陰溝上源濟隧絕焉世謂之十字溝

集說

高氏閌曰以前伐未得志而鄭復來侵宋故也

陳氏傅良曰隱桓之諸侯皆序爵也伯者作

而後小國或序大國之上有以子男長於伯者矣於是世子長於小國之君則悼公為之也季氏本曰舍之侵宋晉亦不救但亦伐鄭而已是時諸侯之兵常在虎牢國君一集則兵力不勞矣卓氏爾康曰此三駕之二擣虛以救宋亦以虎牢先有戍兵易為聲援也

秋七月己未同盟于亳城北

亳蒲洛反公穀作京亳城杜注鄭地當在今河南

府偃

師縣

左傳

鄭人懼乃行成秋七月同盟于亳范宣子曰不

慎必失諸侯諸侯道敵而無成能無貳乎乃盟

載書曰凡我同盟毋瀝年母壅利母保姦母留慝救

災患恤禍亂同好惡獎王室或間茲命司慎司盟名

山名川羣神羣祀先王先公七姓十二國之

祖明神殛之俾失其民隊命亡氏踣其國家

集說

杜氏預曰伐鄭而書同盟鄭與盟可知程子

曰鄭服而同盟也隨復從楚伐宋云同見其反

覆

公至自伐鄭

集說

吳氏澂曰以前事致者見雖同盟而未得鄭也
李氏廉曰此盟後致伐以先事致與伐楚盟

召陵致伐書法同然彼以服楚為大則書致伐者宜也此則未能服鄭正與柯陵事同而書至異者何也穀梁以此為盟後更伐柯陵獨不盟後復伐乎蓋厲公三伐終不能服鄭則只以常例書之此則三駕之後蕭魚序績方以會至故兩書至伐以見兵事之未可息而終書至會以見中國之所以安所謂不一勞者不永逸也歟

楚子鄭伯伐宋

左傳

楚子囊乞旅於秦秦右大夫詹帥師從
楚子將以伐鄭鄭伯逆之丙子伐宋

胡傳

盟于亳城北鄭服而同盟也尋復從楚伐宋故
書同盟見其既同而又叛也既同而又叛從子

展之謀欲致晉師而後與之也故毫之盟其載書曰或間茲命明神殛之俾失其民隊命亡氏陪其國家雖渝此盟而不顧也意慢鬼神至於此極而盟猶足恃乎

集說高氏閼曰盖用公孫舍之之謀以伐宋自信於楚而數叛晉使楚道敵而固與晉以託國焉

公會晉侯宋公衛侯曹伯齊世子光莒子邾子滕子薛

伯杞伯小邾子伐鄭會于蕭魚

此三駕之三
注鄭地路史少昊後羸

姓國修魚
即蕭魚也

左傳

九月諸侯悉師以復伐鄭諸侯之師觀兵於鄭東門鄭人使王子伯駢行成甲戌晉趙武入盟

鄭伯冬十月丁亥鄭子展出盟晉侯十二月戊寅會于蕭魚庚辰赦鄭囚皆禮而歸之納斥侯禁侵掠晉

侯使叔肸告於諸侯公使臧孫紇對曰凡我同盟小國有罪大國致討苟有以藉手鮮不赦宥寡君聞命矣鄭人賂晉侯以師悝師觸師蠲廣車軹車淳十五乘甲兵備凡兵車百乘歌鐘二肆及其鐻磬女樂二八晉侯以樂之半賜魏絳曰子教寡人和諸戎狄以正諸華八年之中九合諸侯如樂之和無所不諧請與子樂之辭曰夫戎狄國之福也八年之中九合諸侯諸侯無慝君之靈也二三子之勞也臣何力之有焉抑臣願君安其樂而思其終也詩曰樂旨君子殿天子之邦樂旨君子福祿攸同便蕃左右亦是帥從夫樂以安德義以處之禮以行之信以守之仁以厲之而後可以殿邦國同福祿來遠人所謂樂也書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之魏絳於是乎始有金石之樂禮也

公羊

此伐鄭也其言會于蕭魚何蓋鄭與會爾

胡傳

程氏曰會于蕭魚鄭又服而請會也不書鄭會謂其不可信也而晉悼公推至誠以待人信鄭

不疑禮其因而歸焉納斥候禁侵掠遣叔肸告於諸侯而鄭自此不復背晉者二十四年至哉誠之能感人也自悼公能謀於魏絳以息民聽於知武子而不與楚戰故三駕而楚不能與之爭雖城濮之績不越矣是

集說

王氏沿曰書公會伐鄭再書會于蕭魚蓋美晉侯之功也亦猶楚屈完來盟于師再書盟于召

陵之義也

劉氏敞曰會于蕭魚鄭伯如會歟則宜以如會書乞盟歟則宜以乞盟書今一皆沒之獨稱

會何哉曰春秋嘉善矜不能而成人之美悼公之服鄭也有道其信義著於諸侯非一日之積此善之可

嘉者也鄭伯之欲從晉也亦非一日之積逼於楚之
疆而未果此不能之可矜者也然則晉之取鄭鄭之
下晉不始於會蕭魚之日其信已在前矣至其會也
諸侯以小息北方以小安是乃有貴乎約信者也其
義不言而喻不盟而壹故略其文以見其實蓋春秋
成人之美之意也陳氏傅良曰有地會而後伐者
矣未有伐而後地會集事之辭也地會而後伐未集事之辭
也伐而後地會集事之辭也伐鄭會于蕭魚序續也
呂氏大圭曰悼公再霸之烈其最可稱道者蕭魚
之會以盟則不如屈完之來有以服其心以戰則不
如城濮之師有以誓其氣然以荆楚方彊子囊為政
而凜然有憚晉之心雖或時帥師徒以示不怯而卒
不能以陵駕北方者豈無故哉觀子囊之言則晉悼
之所以能服楚者固有道矣趙氏鵬飛曰悼公三
年之中五合兵車何晉之連於得鄭哉蓋鄭在楚則
楚患深鄭不歸則兵不息必得鄭以為外禦則諸侯

得以安枕無虞也然鄭自子駢之死君臣皆有歸晉之心戲之盟亳城之役既服而復叛以楚逼之不置耳悼公知楚之遠於鄭故屢出而屢擾之楚知鄭終不能久為楚也數發應兵不勝其疲故亦置而不問焉而鄭亦決於事晉兩犯宋以致晉師藉諸侯之兵叛楚而為晉也蕭魚之役楚疲於外鄭服於內故寸兵不折而鄭自歸隻牲不獻而鄭不叛書曰某侯某侯伐鄭會于蕭魚而鄭默與其列其後二十餘年鄭不復叛而楚不復伐則悼公所以制楚服鄭之功豈不比於桓文耶李氏廉曰晉悼三駕止此八年九合亦止此自襄八年後晉楚爭鄭三年之間晉四興師伐鄭楚輒救之然悼公之服鄭也不以盟誓為信不以威力為武所謂善勝者也故晉之制楚者三文公以力勝厲公以幸勝悼公以善勝其亦庶幾乎召陵之不戰乎伐楚盟召陵伐鄭會蕭魚皆序績之文也汪氏克寬曰會于蕭魚與盟于召陵書法正同

皆一經之特筆所以序二霸之績鄭之服晉不著鄭會而書會于蕭魚公至自會楚人執鄭行人良霄於伐鄭之下得鄭可知矣又曰晉趙武入盟鄭伯鄭子展出盟晉侯經皆略之謂鄭不可信而小信不足恃也又曰齊桓霸業至葵丘而盛桓公束牲載書而不歃血天下諸侯咸喻乎桓公之志晉悼伯業至蕭魚而盛悼公信鄭不疑不復以諸侯同盟而鄭自此不復叛蓋要之以信而使人彊從不若待之以誠而使服也

公至自會

穀梁

伐而後會不以伐鄭致得鄭伯之辭也

集說

杜氏預曰以會至者觀兵而不果侵伐程子曰兵不加鄭故書至自會高氏閔曰春秋以

變文為褒貶屢書盟而不信則以不書盟為誠屢書
伐而無功則以不致伐為美趙氏鵬飛曰亳城之
盟至自伐而蕭魚之役至自會亦足以知其以會為
功而不以伐為功也則諸侯之師蓋陣而不伐歟觀
乎此益見悼公之功不戰不盟而服鄭也李氏康
曰厲公三伐終以伐致悼公三伐終以會致春秋之
立文精矣李氏本曰伐鄭而致會不以
伐為功以會為喜也蕭魚會而兵得息矣

楚人執鄭行人良霄

穀作良霄

左傳鄭人使良霄大宰石彛如楚告將服於晉曰孤
以社稷之故不能懷君君若能以玉帛綏晉不
然則武震以攝威之孤之願也
楚人執之書曰行人言使人也

穀梁行人者挈
國之辭也

集說

杜氏預曰書行人言非使人之罪古者兵交使在其間所以通命示整或執殺之皆為讖也

啖氏助曰稱行人而執以其事執也不稱行人而執以已執也許氏翰曰書楚執良霄見楚之力盡於

是矣高氏閌曰此著晉之所以得鄭也鄭伯使良霄告絕於楚楚人怒而執之雖執之亦不伐鄭是不

能得鄭也不能得鄭者勢分於吳也勢分於吳無如之何故執良霄以舒其憤懣不平之氣自是不復出

師以與晉爭斯見楚力盡於此矣鄭於是乎堅從晉也趙氏鵬飛曰稱行人將使命於楚也鄭既從晉

矣將命於楚何哉告絕也故楚子怒而執之然執鄭行人何傷哉適足以張楚之虐而昭鄭之誠也汪

氏克寬曰悼公之四伐鄭于戲則楚子伐鄭成虎牢則公子貞救鄭亳北則楚鄭伐宋或伐或救或挾鄭

以與晉爭獨至於蕭魚僅能止鄭之一卿而不能出師蓋勢窮力屈知不可敵而不敢抗也季氏本曰

書楚人執鄭行人良霄則鄭之服可知矣悼公之善於屈楚於此可見矣

冬秦人伐晉

左傳

秦庶長鮑庶長武帥師伐晉以救鄭鮑先入晉

氏與鮑交伐晉師已丑秦晉戰於櫟晉師敗績易秦故也

櫟杜注晉地是時秦師濟自輔氏而敗晉於櫟則櫟乃河上之邑也有謂臨潼縣北有櫟鄉城即此櫟者不知櫟鄉去河甚遠非此櫟也

集說

高氏開曰秦景公妹為楚共王夫人於是為楚伐晉報去年之役家氏鉉翁曰晉為秦所敗

春秋略敗而不書不與秦人之為楚而救鄭也

庚靈王十有二年晉悼十二年齊靈二十一年衛獻子一年

曹成十七年陳哀八年杞孝六年宋平十五年秦景十六年楚共三十年吳壽夢二十五年

春王三月莒人伐我東鄙圍台台穀作郛下同 台杜注琅瑯費縣南有台亭

今屬山東兗州府

集說范氏甯曰伐國重圍邑輕舉重可以包輕不足書而今書蓋為下事起劉氏敞曰公羊云伐

而言圍者取邑之辭也非也伐一事也圍一事也取一事也三者不相亂而猶云云不亦惑乎穀梁云取邑不書圍安足書也亦非也取邑不書有所避爾高氏閌曰諸侯伐我未有言圍邑者書圍邑自此始莒人間歲伐我公五與莒子會宜其釋怨同好矣而見伐不已則魯弱可知矣

季孫宿帥師救台遂入鄆

鄆公作運
文十二年
季孫杜注莒邑案

諸及鄆即此也蓋季孫城鄆時鄆方屬魯後入於莒是年雖入鄆而未能有之昭元年季孫宿伐莒取鄆

則又屬

魯矣

左傳

十二年春莒人伐我東鄙圍台季武子救台遂入鄆取其鐘以為公盤

公羊

大夫無遂事此其言遂何公不得為政爾

穀梁

遂繼事也受命而救台不受命而入鄆惡季孫宿也

胡傳

鄆莒邑也遂者生事也入者逆詞也大夫無遂事受命而救台不受命而入鄆惡季孫宿之擅

權使公不得有為於其國也或曰古者命將得專制閫外之事有可以安國家利社稷者專之可也曰此

為境外言之也。台在邦域之中而專行之，非有無君之心者，不敢為也。昭公逐定，無正夫，豈一朝一夕之故哉？其所由來者漸矣。

集說

何氏休曰：時公微弱，政教不行，故季孫宿遂取鄆而自益其邑。高氏閌曰：文十二年，當帥師

城鄆矣。魯不能守，復為莒所取。今復取之，季孫因救台而入鄆，是無君也。家氏鉉翁曰：宿始繼其父，即首城賜邑，繼而作三軍，取公室之丘甸，以為己之私。有今而救台，遂事入鄆，取邑以自廣，其心非為國也。李氏廉曰：襄公之編書救邑者，二此年救台十五年救成，蓋作三軍之後，魯益弱矣。以區區之邦，莒而連年來伐，況齊乎？然季孫救台，遂入鄆而不忌，公親救成，乃至遇而不取，前君弱，臣彊，又可知矣。汪氏克寬曰：春秋書遂事者十九，而內大夫遂事有三，公子遂如京師，遂如晉，乃受君命而以二事出者也。公

子結媵陳人之婦于鄆遂及齊侯宋公盟季孫宿救
台遂入鄆皆以一事出而專繼事者也然結之遂盟
致三國之伐乃禮樂之事事雖有害而意猶公也宿
之入鄆乃征伐之事事雖有利而意則純乎私矣於
惡之中又有惡焉
遂入鄆之類是也

夏晉侯使士魴來聘

左傳

夏晉士魴來聘且拜師

集說

杜氏預曰謝前年伐鄭師鄭抑楚而聘魯善持勝也

許氏翰曰晉悼服趙氏鵬飛曰晉以

聘問維諸侯薄往而厚來霸者之術也故冬公如晉

秋九月吳子乘卒

吳始書卒

左傳

秋吳子壽夢卒臨於周廟禮也凡諸侯之喪異姓臨於外同姓於宗廟同宗於祖廟同族於禘

廟是故魯為諸姬臨於周廟為邢凡蔣茅昨祭臨於周公之廟

集說

徐氏彥曰案宣十八年秋楚子旅卒而吳至是乃書卒者正以其與列國會同本在楚後是以

春秋略之杜氏諤曰宣十八年錄楚子旅卒者甚其暴盛而諸侯交接赴告之相親也此書吳子卒亦以其暴盛且明諸侯通之會之而赴告之相及也趙氏鵬飛曰吳楚不書葬非魯不會也聖人削之避其號耳

冬楚公子貞帥師侵宋

左傳

冬楚子囊秦庶長無地伐宋師於楊梁以報晉之取鄭也

揚梁杜注梁國睢陽縣東有地名揚梁水經注漢水東逕陽亭北即揚梁也今在歸德府城東南三十里

集說

高氏閔曰秦人與馬而削之者楚人率秦故專罪楚也李氏廉曰著楚之無能為也汪氏

克寬曰傳言伐而經書侵貶之也李氏本曰晉既得鄭而楚欲得志於宋故使公子貞侵之然楚兵加宋每無功焉蓋為晉人不戰所屈而樂喜謀國之功亦不可少也

附錄左傳

靈王求后於齊齊侯問對於晏桓子桓子對曰先王之禮辭有之天子求后於諸侯

諸侯對曰夫婦所生若而人妾婦之子若而人無女而有姊妹及姑姊妹則曰先守某公之遺女若而人齊侯許昏王使陰里結之

公如晉

左傳

公如晉朝且拜士魴之辱

集說

趙氏匡曰左氏云且拜士魴之辱禮也案大國使聘即須自往拜之是公無寧歲也而言禮也

一何

繆乎

高氏閔

曰晉侯一使人來聘而公遂親往朝之事晉之禮恭矣

附錄左傳

秦嬴歸於楚楚司馬子庚聘於秦為夫人寧禮也

辛靈王十
丑二年

十有三年

晉悼十三年齊靈二十二年衛獻十七年蔡景三十二年鄭簡六年

曹成十八年陳哀九年杞孝七年宋平十六年秦景十七年楚共三十一年吳諸樊遏元年

春公至自晉

左傳

十三年春公至自晉孟獻子書勞於廟禮也

集說

杜氏預曰書勲勞於策也桓二年傳曰公至自唐告於廟也凡公行告於宗廟反行飲至舍爵

策勲焉禮也桓十六年傳又曰公至自伐鄭以飲至之禮也然則還告廟及飲至及書勞三事偏行一禮則亦書至悉闕乃不書至孔氏穎達曰凡反行飲至必以嘉會昭告祖禰有功則舍爵策勲無勞告事而已杜氏諤曰公行踰年而返不可不致之

夏取邾

邾音詩公作詩邾杜注任城亢父縣有邾亭後漢建武二年封劉隆為邾侯即此也今亢父

城在濟寧州南五十

里邾城在州東南

左傳

夏邾亂分為三師救邾遂取之

集說

楊氏士勛曰公羊以邾為邾婁之邑此傳雖無說蓋從左氏為國也孔氏穎達曰釋例曰乘

其衰亂或受其潰叛或用少師而不頓兵勞力則直言取如取如攜言其易也劉氏敞曰左氏曰凡書

取言易也用大師曰滅弗地曰入非也春秋之興褒善貶惡所以示後世法非記難易而已也難易何足

紀乎許氏翰曰晉始息民是以楚侵宋而不報魯取邾而不討取無大亂而已高氏閌曰魯乘亂滅

之以為附庸不言滅者內大惡故婉其辭也趙氏鵬飛曰邾小國也內諱滅書取視若已地而取之諱

之適所以張之也此所謂隱而顯者也汪氏克寬曰公羊以邾為邾邑然不書伐邾則非邾邑明矣

季氏本曰邾近魯微國取之以為己邑

附錄左傳

荀瑩士魴卒晉侯蒐於綿上以治兵使士句將中軍辭曰伯游長昔臣習於知伯是

以佐之非能賢也請從伯游荀偃將中軍士句佐之使韓起將上軍辭以趙武又使樂廩辭曰臣不如韓起韓起願上趙武君其聽之使趙武將上軍韓起佐之樂廩將下軍魏絳佐之新軍無帥晉侯難其人使其什吏率其卒乘官屬以從於下軍禮也晉國之民是以大和諸侯遂睦君子曰讓禮之主也范宣子讓其下皆讓樂廩為汰弗敢違也晉國以平數世賴之刑善也夫一人刑善百姓休和可不務乎書曰一人有慶兆民賴之其寧惟永其是之謂乎周之興也其詩曰儀刑文王萬邦作孚言刑善也及其衰也其詩曰大夫不均我從事獨賢言不讓也世之治也君子尚能而讓其下小人農力以事其上是以上下有禮而讒慝黜遠由不爭也謂之懿德及其亂也君子稱其功以加小人小人伐其技以馮君子是以上下無禮亂虐竝生由爭善也謂之昏德國家之敝恆必由之

秋九月庚辰楚子審卒

左傳

楚子疾告大夫曰不穀不德少主社稷生十年而喪先君未及習師保之教訓而應受多福是

以不德而亡師於郢以辱社稷為大夫憂其弘多矣若以大夫之靈獲保首領以沒於地惟是春秋寃寃之事所以從先君於禰廟者請為靈若厲大夫擇焉莫對及五命乃許秋楚共王卒子囊謀諡大夫曰君有命矣子囊曰君命以共若之何毀之赫赫楚國而君臨之撫有蠻夷奄征南海以屬諸夏而知其過可不謂共乎請諡之共大夫從之

附錄左傳

吳侵楚養由基奔命子庚以師繼之養叔曰吳乘我喪謂我不能師也必易我而不

戒子為三覆以待我我請誘之子庚從之戰於庸浦大敗吳師獲公子黨君子以吳為不弔詩曰不弔吳

天亂靡有定

庸浦杜注楚地當在今無為州南

冬城防

左傳冬城防書事時也於是將早城臧武仲請俟畢農事禮也

集說許氏翰曰鄭役既息魯政有裕則知取邾以為利城防以為安而已矣高氏閔曰防臧氏之

邑也厥後齊高厚伐我北鄙圍防則城者畏齊也趙氏鵬飛曰魯有二防一近宋隱十年伐宋取防是

也一近齊隱九年公會齊侯于防是也今之城疑近齊之防耳魯既事晉而外齊懼有齊師故城防以備

之而明年齊卒有圍成之役用是知城防以備齊也李氏康曰莊二十九年己城防矣今又城之蓋臧

武仲始受邑也十七年齊師圍臧孫于防二十四年臧孫自邾如防以求後於魯此一防之始末也觀下年會向伐秦齊崔杼皆怠慢不攝悼公既卒齊師先叛則城防其亦為疆事之備歟

附錄左傳

鄭良霄大宰石彛猶在楚石彛言於子囊曰先王卜征五年而歲習其祥祥習則行

不習則增修德而改卜今楚實不競行人何罪止鄭一卿以除其偏使睦而疾楚以固於晉焉用之使歸而廢其使怨其君以疾其大夫而相牽引也不猶愈乎楚人歸之

壬靈王十三年

十有四年

晉悼十四年齊靈二十三年衛獻十八年蔡景三十三年鄭簡七年

曹成十九年陳哀十年杞孝八年宋平十七年秦景十八年楚康王昭元年吳諸樊二年

春王正月季孫宿叔老會晉士匄齊人宋人衛人鄭公

孫蔓曹人莒人邾人滕人薛人杞人小邾人會吳于向

蔓丑邁反公
作嚙後同

左傳

十四年春吳告敗於晉會于向為吳謀楚故也
范宣子數吳之不德也以退吳人執莒公子務

婁以其通楚使也於是子叔齊子為季武
子介以會自是晉人輕魯幣而益敬其使

胡傳

使舉上客而叔老並書者以內卿行則不得不
書矣季孫宿以卿為介而不使之免叔老介於

宿而不敢避蓋兩失之雖晉人輕其幣
而敬其使於君命使人之體豈為得哉

集說

杜氏預曰魯使二卿會晉敬事伯國晉人輕魯
幣而益敬其使故叔老雖介亦列於會也吳來

在向諸侯會之故曰會吳
劉氏敞曰傳曰將執戎
子駒支范宣子親數於朝曰今諸侯之事我寡君不

如昔者言語漏洩職女之由此皆不實也諸侯解體
非此戎之過審矣范宣子豈不知邪何以誣之哉去
年蒐于綿上傳曰晉國由是大和諸侯遂睦到此一
年爾何故遽有言語漏洩不如昔者之事邪言與事
不相應矣又曰宣子辭焉使即事於會以成愷悌然
則是姜戎列於會矣經何以不序乎許氏翰曰四
卿帥師自成公始二卿列會自襄公始大夫張也
陳氏傅良曰向之會悼德衰矣退吳人而卒會吳執
莒公子而卒會莒諸侯之大夫從晉侯伐秦而悼不
自將荀偃樂廩一爭而大還是故伐秦之役不書晉
侯志晉侯之急也自是會澶淵晉趙武宋向戌不書
書鄭良霄於城杞鄭游吉不書書公孫段則君令多
不行於大夫矣家氏鉉翁曰內大夫未有二卿俱
會者志二卿之不當竝行也吳氏澂曰左氏以此
會為吳謀楚然吳在向而晉率諸侯之大夫往會之
是晉有求於吳非吳有求於晉也李氏廉曰晉之

會吳止此自此以後吳不資於晉晉亦不能致吳至黃池而兩伯竝列矣汪氏克寬曰卿使則大夫為介大夫使則士為介昭二十三年叔孫婁如晉曰寡君之命介子服回在媾卿而回大夫也今魯以二卿會晉而晉列二卿於會晉魯俱失禮矣且自蕭魚而後凡役皆大夫悼公之怠而霸業之衰也

附錄左傳

吳子諸樊既除喪將立季札季札辭曰曹宣公之卒也諸侯與曹人不義曹君將立

子臧子臧去之遂弗為也以成曹君君子曰能守節君義嗣也誰敢奸君有國非吾節也札雖不才願附於子臧以無失節固立之棄其室而耕乃舍之

二月乙未朔日有食之

夏四月叔孫豹會晉荀偃齊人宋人衛北宮括鄭公孫

冀曹人莒人邾人滕人薛人杞人小邾人伐秦

晉秦兵爭止此

左傳

夏諸侯之大夫從晉侯伐秦以報櫟之役也晉侯待於竟使六卿帥諸侯之師以進及涇不濟

叔向見叔孫穆子穆子賦匏有苦葉叔向退而具舟魯人莒人先濟鄭子驥見衛北宮懿子曰與人而不固取惡莫甚焉若社稷何懿子說二子見諸侯之師而勸之濟濟涇而次秦人毒涇上流師人多死鄭司馬子驥帥鄭師以進師皆從之至于棧林不獲成馬荀偃令曰雞鳴而駕塞井夷竈惟余馬首是瞻樂廩曰晉國之命未是有也余馬首欲東乃歸下軍從之左史謂魏莊子曰不待中行伯乎莊子曰夫子命從帥樂伯吾帥也吾將從之從帥所以待夫子也伯游曰吾令實過悔之何及多遺秦禽乃命大還晉人謂之遷延之役樂鍼曰此役也報櫟之敗也役又無功晉之恥也吾有二位於戎路敢不恥乎與士鞅馳秦

師死馬士鞅反樂廩謂士句曰余弟不欲往而子召
之余弟死而子來是而子殺余之弟也弗逐余亦將
殺之士鞅奔秦秦伯問於士鞅曰晉大夫其誰先亡
對曰其樂氏乎秦伯曰以其汰乎對曰然樂廩汰虐
已甚猶可以免其在盈乎秦伯曰何故對曰武子之
德在民如周人之思召公馬愛其甘棠況其子乎樂
廩死盈之善未能及人武子所施沒矣而廩之怨實
章將於是乎在秦伯以為知言為之請於晉而復之
械林杜注秦地案械林即舊鄭咸
林也今為華州屬陝西西安府

集說趙氏匡曰左氏云齊宋大夫不書情也向之會
亦如之衛北宮括書於伐秦攝也案經意以事
之邪正褒貶不為其小小幹舉情怠生文高氏闕
曰春夏興師煩擾列國將帥不和威德兩弛晉國之
政衰矣汪氏克寬曰晉秦七十年之兵爭鬬於
圍鄭怨結於敗穀禍稔於三戰大舉於九國之伐而

終於此役蓋自文公之霸合諸侯之師未有若是之衆也然以十三國之卿大夫帥重兵以壓境而師出無律將各異心徒以煩民功績蔑有晉侯待於境上視若贅旒皆悼公之怠於政事致諸臣之專恣也

已未衛侯出奔齊

公作衛侯衍

左傳

衛獻公戒孫文子甯惠子食皆服而朝日旰不

二子怒孫文子如戚孫蒯入使公飲之酒使大師歌巧言之卒章大師辭師曹請為之初公有嬖妾使師

曹誨之琴師曹鞭之公怒鞭師曹三百故師曹欲歌之以怒孫子以報公公使歌之遂誦之蒯懼告文子

文子曰君忌我矣弗先必死并帑於戚而入見蘧伯玉曰君之暴虐子所知也大懼社稷之傾覆將若之

何對曰君制其國臣敢奸之雖奸之庸知愈乎遂行從近闕出公使子驍子伯子皮與孫子盟于丘宮孫

子皆殺之四月己未子展奔齊公如鄆使子行於孫
子孫子又殺之公出奔齊孫氏追之敗公徒于阿澤
鄆人執之初尹公佗學射於庾公差庾公差學射於
公孫丁二子追公公孫丁御公子魚曰射為背師不
射為戮射為禮乎射兩鞬而還尹公佗曰子為師我
則遠矣乃反之公孫丁授公轡而射之貫臂子鮮從
公及竟公使祝宗告亡且告無罪定姜曰無神何告
若有不可誣也有罪若何告無舍大臣而與小臣謀
一罪也先君有冢卿以為師保而蔑之二罪也余以
巾櫛事先君而暴妾使余三罪也告亡而已無告無
罪公使厚成叔弔於衛曰寡君使瘠聞君不撫社稷
而越在他竟若之何不弔以同盟之故使瘠敢私於
執事曰有君不弔有臣不敏君不赦宥臣亦不帥職
增淫發洩其若之何衛人使大叔儀對曰羣臣不佞
得罪於寡君寡君不以即刑而悼棄之以為君憂君
不忘先君之好辱弔羣臣又重恤之敢拜君命之辱

重拜大貺厚孫歸復命語臧武仲曰衛君其必歸乎
有大叔儀以守有母弟鱄以出或撫其內或營其外
能無歸乎齊人以邾寄衛侯及其復也以邾糧歸右
宰穀從而逃歸衛人將殺之辭曰余不說初矣余狐
裘而羔袖乃赦之衛人立公孫剝孫林父甯殖相之
以聽命於諸侯衛侯在邾臧紇如齊唁衛侯衛侯與
之言虐退而告其子曰衛侯其不得入矣其言糞土
也亡而不變何以復國子展子鮮聞之見臧紇與之
言道臧孫說謂其人曰衛君必入得乎

丘宮杜注近臧地 阿澤杜注濟北東阿
縣西南有大澤 邾杜注齊所滅邾國

集說 許氏翰曰逐君之惡未有若林父者矣鄭厲衛
惠猶以禮去者也春秋之季君弱臣彊衛獻出
奔不名所以抑彊臣而存大義也 李氏康曰此年
衛侯奔剽立二十年甯殖卒遺命其子喜納衛侯二

十五年晉人令衛與之夷儀衛侯入夷儀其冬使與甯喜言求復國二十六年喜弑剽衍復國二十七年殺喜子鮮奔晉汪氏克寬曰王氏箋義云衛侯不道失國當從公羊書名今考二十五年入夷儀三傳皆不名經必有義不可彊合失國書名之例王氏雅曰案春秋惟弑君書某弑其君至於君為其下所出止書出奔而已如臣見逐亦止書某奔某也胡傳謂舊史書孫林父甯殖出其君而仲尼筆削稱衛侯出奔恐無此理出之為言不容而見逐之謂也臣子施於君父而史官直書於策則非辭也故但言出奔而已言出奔則或君無道或臣彊皆可推上下比事而見之矣專以為歸罪其君者害教之言也嚴氏啟隆曰胡傳曰不書所逐之臣而以自奔為名所以警乎人君為後世鑒又曰所為見逐無乃肆於民上縱其淫虐以棄天地之性然則經書衛侯出奔齊全乎責衍之意而於林父竟無責乎率天下之人而為

哉君逐君之事者必此之言矣

案春秋於衛侯之出不書逐君之賊而以自奔為文杜注孔疏皆以為責其君而胡傳因之非經旨也人臣而出其君罪莫大焉乃謂聖人專責其君有是理乎故王氏樵嚴氏啟隆皆駁之

附錄左傳

師歸自伐秦晉侯舍新軍禮也成國不過半天子之軍周為六軍諸侯之大者三軍

可也於是知朔生盈而死盈生六年而武子卒羸裘亦幼皆未可立也新軍無帥故舍之師曠侍於晉

侯晉侯曰衛人出其君不亦甚乎對曰或者其君實甚良君將賞善而刑淫養民如子蓋之如天容之如地民奉其君愛之如父母仰之如日月敬之如神明畏之如雷霆其可出乎夫君神之主而民之望也若困民之主匱神乏祀百姓絕望社稷無主將安用之弗去何為天生民而立之君使司牧之勿使失性有

君而為之貳使師保之勿使過度是故天子有公諸侯有卿卿置側室大夫有貳宗士有朋友庶人工商卑隸牧圉皆有親暱以相輔佐也善則賞之過則匡之患則救之失則革之自王以下各有父兄子弟以補察其政史為書瞽為詩工誦箴諫大夫規誨士傳言庶人謗商旅於市百工獻藝故夏書曰道人以木鐸徇于路官師相規工執藝事以諫正月孟春於是乎有之諫失常也天之愛民甚矣豈其使一人肆於民上以從其淫而棄天地之性必不然矣

案是時晉悼伯業漸衰無復勵精之志執政大夫如荀偃輩皆與孫甯為黨故師曠承望風旨而有其君實甚之言得罪於名教多矣

宮人侵我東鄙

集說

杜氏預曰報入鄆四伐我矣是無晉也

高氏閔曰莒自滅鄆之後趙氏鵬飛曰季孫宿入

鄆非兵首也而莒猶以為憾侵我東鄙報入鄆之役

馬至十六年魯訴於晉晉人執而釋之然後少俊故

二十年為向之盟而魯始無東鄙之患

汪氏克寬曰湟梁之執盖有由矣

秋楚公子貞帥師伐吳

左傳

秋楚子為庸浦之役故子囊帥師於棠以伐吳吳

皋舟之隘要而擊之楚人不能相救吳人敗之獲楚公子宜穀

棠楚地寰宇記六合古棠邑晉立堂邑郡周改六合郡隋廢郡為六合縣至今仍之屬江南江寧府

集說

趙氏鵬飛曰楚康即位修先君之怨於諸侯謂楚所以不得志於北方者吳實為之梗也故置

宋鄭不問而首伐吳焉今伐而未得吳故二十二年親伐之其所以讐吳也深矣汪氏克寬曰楚既不得志於北方故致怨於吳也

附錄左傳

王使劉定公賜齊侯命曰昔伯舅大公右我先王股肱周室師保萬民世祚大師以

表東海王室之不壞繫伯舅是賴今余命女環茲率舅氏之典纂乃祖考無忝乃舊敬之哉無廢朕命

冬季孫宿會晉士句宋華閱衛孫林父鄭公孫蠆莒人

邾人于戚

閱音悅

左傳

晉侯問衛故於中行獻子對曰不如因而定之衛有君矣伐之未可以得志而勤諸侯史佚有

言曰因重而撫之仲虺有言曰亡者侮之亂者取之推亡固存國之道也君其定衛以待時乎冬會于戚

謀定衛也范宣子假羽毛
於齊而弗歸齊人始貳

集說

許氏翰曰衛人立剽非正也而謀定之則正弗勝矣林父在會是以知其謀定剽也高氏閏

曰諸國書卿明皆林父之儔也陳氏傅良曰襄昭之際大夫無君之禍晉為之也悼公之德衰矣薛

氏李宣曰衛亂不討會其賊以定之非義也張氏洽曰前書衛侯之奔此列孫林父於會晉為霸主抑

君而臣是助具書於策則晉大夫之黨林父罪惡具見家氏鉉翁曰晉悼用師於鄭衛衍無會不往無

役不從今為其臣所逐晉當會諸侯納衛君誅孫甯以伸伯討乃盟主職分之所宜為既不能然反聽賊

臣立君而為會以定其位此春秋之所甚惡也王氏貫道曰戚林父邑也合列國於孫氏私邑抑君而

臣是助非正名之義矣李氏廉曰衛侯出奔而林父會于戚昭公在乾侯而李孫會適厖釋君助臣之

禍前後一轍悼公霸業盡喪矣荀偃親弑君之人而
以此問之悼公之聰明不逮少年矣齊人之貳豈待
假羽毛哉王氏錫爵曰荀偃本弑君之賊故為逆
賊謀而成其弑君之亂自是剽弑而衍歸衛有二君
者十年晉實為之也賢如
悼公竟為荀偃所誤惜哉

附錄左傳

楚子囊還自伐吳卒將死遺言謂子庚必
城郢君謂子囊忠君薨不忘增其名將

死不忘衛社稷可不謂忠乎忠民之
望也詩曰行歸于周萬民所望忠也

癸靈王十
卯四年

十有五年

晉悼十五年齊靈二十四年衛獻
十九年殤公剽元年蔡景三十四

年鄭簡八年曹成二十年陳哀十一年杞孝九年
宋平十八年秦景十九年楚康二年吳諸樊三年

春宋公使向戌來聘二月己亥及向戌盟于劉

劉孔氏
穎達曰

釋例地關蓋魯城外之近地

左傳

十有五年春宋向戌來聘且尋盟見孟獻子尤其室曰子有令聞而美其室非所望也對曰我

在晉吾兄為之毀之重勞且不敢間

集說

杜氏預曰報二年豹之聘尋十一年亳之盟許氏翰曰不盟于國而盟于劉崇向戌故公弱

甚矣

汪氏克寬曰不言公見其伉也聘而遂盟已為非禮況以千乘之君而降尊失列與之盟於國都

之外乎公嘗如晉而及晉侯盟長檮此霸主謙遜以懷望國而非諸侯待鄰國大夫之所當施也朝聘而

盟于外惟此兩見而已

劉夏逆王后于齊

左傳

官師從單靖公逆王后于齊卿不行非禮也

公羊

劉夏者何天子之大夫也劉者何邑也其稱劉何以邑氏也

胡傳

劉夏何以不稱使不與天子之使夏也昏姻人倫之本王后天下之母劉夏士也士而逆后是不重人倫之本而輕天下之母矣然則何使卿往逆

公監之禮也官師從單靖公逆王后于齊書劉夏而不書靖公是知卿往逆公監之禮也春秋昏姻得禮者常事不書

集說

杜氏預曰劉采地夏名也天子卿書字劉夏非卿故書名孔氏穎達曰諸侯之娶言逆女此

與桓八年皆言逆王后者天子無外所命則已成后矣故不言逆女也孫氏復曰天子不親逆取后則三公逆之劉夏士也王后天下母使微者逆之可哉故曰劉夏逆王后于齊以著其非劉氏故曰穀梁

曰過我故志之非也王后尊矣禮自當志豈與諸侯一例以過我而書哉然則他王后不見者太子立則妃為后自無緣見耳孫氏覺曰天子無親迎之禮逆后則使三公春秋書逆后者二祭公行得禮而又書之者譏遂事也劉夏之逆則以非三公譏之春秋周王十二而逆后者惟二是知非禮則書也家氏鉉翁曰桓八年祭公來遂逆王后于紀謀之於魯也今劉夏其亦詢度而往歟周天子昏姻多以命魯非譏其來譏其以官師行卿事吳氏澂曰王后天下母上儀天王猶乾之有坤可不重歟祭公遂行逆后而紀姜適歸京師其逆其歸兩從苟簡故書逆書歸劉夏以士逆后而齊之歸女無違於禮書逆故不書歸得禮者不書失禮然後書

附錄左傳

楚公子午為令尹公子罷戎為右尹為子馮為大司馬公子橐師為右司馬公子成

為左司馬屈到為莫敖公子追舒為箴尹屈蕩為連尹養由基為宮廩尹以靖國人君子謂楚於是乎能官人官人國之急也能官人則民無覲心詩云嗟我懷人寔彼周行能官人也王及公侯伯子男甸采衛大夫各居其列所謂周行也鄭尉氏司氏之亂其餘盜在宋鄭人以子西伯有子產之故納賂於宋以馬四十乘與師役師慧三月公孫黑為質馬司城子罕以堵女父尉翩司齊與之良司臣而逸之託諸季武子武子寔諸卜鄭人醢之三人也師慧過宋朝將私焉其相曰朝也慧曰無人焉相曰朝也何故無人慧曰必無人焉若猶有人豈其以千乘之相易淫樂之矇必無人焉故也子罕聞之固請而歸之

夏齊侯伐我北鄙圍成公救成至遇

遇杜注魯地

公羊

其言至遇何不敢進也

集說

杜氏預曰公畏齊不敢至成劉氏絢曰武備不謹成郭見圍救患當速乃復畏避公之所為

可知矣

高氏閔曰衛侯在齊季孫宿為戚之會以

定衛而齊

不與焉齊固有憾於諸侯矣伐我北鄙以

此之故魯於是時三分其民而公室卑弱已不足以當敵故書公救成至遇陳氏傳良曰自宣之季年

內不言

君將於是救成而不敢進無惑乎三家之專魯也

家氏

鉉翁曰魯本非弱國自季專政務豐植

其私門城費矣又取公室之丘甸卒乘自歸其私於

是魯君拱手於上邾莒交侵齊亦屢伐譬之百金之

家猶足自立而盜起於內莫知所以制之則外寇之

來亦付之無可奈何而已李氏廉曰此齊之弱魯

第五役也自鞍戰之後齊兵不至魯者三十餘年則

以畏晉之故也於是再見晉悼衰矣三年之間伐魯

者六而有同圍之師又曰此隳成不服之始事也春

秋書齊之圍成者二此年及明年公之圍成者二昭

二十六年定十二年始則疆
事之無備終則家臣之恃疆

李孫宿叔孫豹帥師城成鄢

左傳

夏齊侯圍成貳於晉
故也於是乎城成鄢

集說

蘇氏轍曰備齊也
大夫帥師而城者三

胡氏銓曰城築二十有九

帥師而城者皆三家也

劉氏絢曰由不能救成故

成鄢見壞而城也高氏閔曰此孟孫之邑而李孫

叔孫帥師以城之者見三家相黨以備齊為名而興

役之衆故其城堅固可守卒為魯患而不可墮也

張氏洽曰先事之無備敵去而後城亦已晚矣黃

氏仲炎曰城成鄢者名曰備齊其實城孟氏私邑爾

孟氏邑而叔李城之何也三家合為一體以弱公室

也家氏鉉翁曰寇未至無備及見圍救之又緩逮

其去乃城之魯之
治其國者可見矣

秋八月丁巳日有食之

集說
張氏洽曰悼公卒
政逮大夫之徵也

邾人伐我南鄙

左傳
秋邾人伐我南鄙使告於晉晉將為會以討
邾莒晉侯有疾乃止冬晉悼公卒遂不克會

集說
許氏翰曰政在君則民一民一則國彊政在臣
則民二民二則國弱魯自文公失政大夫益竊

國柄齊與邾莒交伐其國不競甚矣無他民分於三
桓故也
王氏貫道曰邾屬於齊而黨於莒齊莒來

伐故邾
亦故尤

冬十有一月癸亥晉侯周卒

集說

許氏翰曰悼公之霸功亞桓文平公受之遺烈猶在祝柯澶淵之盟是已自是則晉日替矣

趙氏鵬飛曰晉室中饋三郤誅厲公弑悼公以公族自外入繼即位之初慨然思復文公之業一圍宋彭城而得諸侯再奪鄭虎牢而得鄭陳外抗彊楚內通東吳蕭魚之會不戰不盟楚不敢爭鄭不敢叛雖召陵之役不是過也其為國也施舍已責逮鰥寡振廢滯康乏困救災患禁淫慝薄賦歛宥罪戾舉不失職官不易方爵不踰德師不陵正旅不偏官民無謗言所以復霸諸侯至於屈王臣以同敵于難澤用諸侯以報怨於秦則亦未逃末習歟惜哉李氏康曰悼公立於成十八年凡十六年起西公之衰而復文襄之盛入國之明日遂不臣者七人即位之一月取六官於民譽蓋晉賢侯也李氏曰晉悼公其猶有君子

之資乎不獨伯功之美也齊桓歷變履險以數十年之經營而行事未免過舉晉文老於奔走晚而復國然血氣之驕悍未除悼公之苗淺矣乃能忠厚而不迫堅忍而持重有回顏却慮之謀無輕逞輒快之舉其亦稍知以道養心歟八年九合則勤於安夏也三分四軍則謹於用民也六卿選德則用人有章也騶御知訓則教士有法也此其所以能得諸侯服鄭而駕楚也使晉以詐力相長未必能服諸侯也悼公先以謙德臨之難澤之名諸侯曰寡君願與二三兄弟相見以謀不協故十三國相與周旋不令而從無滅譚滅遂執曹執衛之事使晉以盟誓為信未必能得鄭也悼公純以誠心行之鄭子展曰晉君方明必不棄鄭故五會之信終於不盟無非盟乞盟之煩使晉以戰伐為威未必能駕楚也悼公一以容量處之楚子囊曰晉不可敵事之而後可故三駕之烈不交一旅無城濮鄢陵之勞是三者非有君子之資乎然能

服諸侯而不能杜大夫用事之漸能得鄭而不掩失
陳之責夫諸侯盟誓之權非大夫敢干也蕭魚已後
凡三大會荀偃士句儼然臨之諸侯雖合大夫浸分
何謹於諸侯而縱於大夫乎陳不可棄猶鄭不可舍
也戊陳之役以為有陳非吾事無之而後可鄭雖向
晉陳竟歸楚何工於撫鄭而拙於懷陳乎不然悼公
之霸過桓文矣季氏本曰晉悼公召集諸侯則惟
示謙德經營列國則惟務息民可謂有君子之資矣
但以孫林父之懷姦而不能正齊靈公之撓霸而不
能馴邾莒之肆行無忌而不能禁悼公之治亦疎矣
王氏樵曰案不討衛孫林父甯殖逐君之惡尤失
之大者魯之三家晉之六卿齊之崔慶陳氏視此而
縱矣

附錄左傳

鄭公孫夏如晉奔喪子矯送葬宋人或
得玉獻諸子罕子罕弗受獻玉者曰以示

王人王人以為寶也故敢獻之子罕曰我以不貪為寶爾以玉為寶若以與我皆喪寶也不若人有其寶稽首而告曰小人懷璧不可以越鄉納此以請死也子罕寘諸其里使王人為之攻之富而後使復其所

十二月鄭人奪堵狗之妻而歸諸范氏

甲辰五年

十有六年

晉平公彪元年齊靈二十五年衛獻二十一年殤二年蔡景三十五年

鄭簡九年曹成二十一年陳哀十二年杞孝十年宋平十九年秦景二十年楚康三年吳諸樊四年

春王正月葬晉悼公

集說

杜氏預曰踰月而葬速也孔氏穎達曰四年七月夫人如氏薨八月葬我小君定姒纔別月

耳杜云踰月而葬速也今晉悼往年十一月卒此年正月葬積三月也杜亦云踰月而葬者踰越也所越

有多有少俱是踰越之義故杜弘通兩解之鄭氏
玉曰欲會諸侯而速葬其親背禮莫斯為甚何以為
盟主而令諸侯乎宜晉霸之不競也李氏本曰晉
平公初立見諸侯尚多不協故汲汲焉欲合諸侯喪
未三月而速葬也

三月公會晉侯宋公衛侯鄭伯曹伯莒子邾子薛伯杞

伯小邾子于溴梁戊寅大夫盟

溴水出河內軹縣東南

至溫入河案爾雅梁莫大于溴梁溴梁水隄也今濟源縣西北原山有白澗水即溴梁也

左傳

平公即位羊舌肸為傅張君臣為中軍司馬祁奚韓襄欒盈士鞅為公族大夫虞丘書為乘馬

御改服修官烝於曲沃警守而下會于溴梁命歸侵田晉侯與諸侯宴於溫使諸大夫舞曰歌詩必類齊

高厚之詩不類荀偃怒且曰諸侯有異志矣使諸大夫盟高厚高厚逃歸於是叔孫豹晉荀偃宋向戌衛甯殖鄭公孫蠆小邾之大夫盟曰同討不庭

公羊 諸侯皆在是其言大夫盟何信在大夫也何言乎信在大夫徧刺天下之大夫也曷為徧刺天

下之大夫君若贅旒然

穀梁 梁之會諸侯失正矣諸侯會而曰大夫盟正在大夫也諸侯在而不曰諸侯之大夫大夫不也臣

胡傳 壯丘之會諸侯既次于匡則書曰公孫教帥師及諸侯之大夫救徐雞澤之會諸侯既盟而陳

侯使袁僑如會則書曰叔孫豹及諸侯之大夫及陳袁僑盟今梁之會諸侯皆在是若欲使大夫盟者

則書魯卿及諸侯之大夫盟可也而獨書大夫何也諸侯失政大夫皆不臣也上二年春正月會于向十有四國之大夫也夏四月會伐秦十有三國之大夫也冬會于戚七國之大夫也此三會皆國之大事也而使大夫皆專之而諸侯皆不與焉是列國之君不自為政弗躬弗親禮樂征伐已自大夫出矣况悼公既沒晉平初立無先公之明也君若贅旒而大夫張亦宜矣夫豈一朝一夕之故哉善惡積於至微而不靖公廢趙籍韓虔魏斯為諸侯之勢見矣有國者謹於禮而不敢忽此春秋以待後世之意也

集說

杜氏預曰不書高厚逃歸故也諸大夫本欲盟高厚高厚逃歸故遂自共盟雞澤會重序諸侯

今此間無異事即上諸侯大夫可知孔氏穎達曰案傳荀偃怒使諸侯大夫盟高厚以君臣不敵故使

大夫盟之君使之盟非自專也以齊人既有二心高
厚歌詩不類知小國必有從齊者也諸侯大夫本意
欲盟高厚高厚雖已逃歸仍恐餘國有二故大夫遂
自共盟使同會之國皆一其志也雞澤之會又隔袁
僑如會故重言諸侯之大夫今此間無異事直言大
夫即是上會諸侯之大夫不言諸侯可知故也陸
氏淳曰淳聞於師曰諸侯為會而使大夫盟晉侯失
盟主之道矣不曰晉侯使之參譏之也盧氏全曰
諸侯之大夫自盟君各在會則諸侯之政自茲失矣
三桓逐魯六卿分晉其所由來者漸高氏閔曰為
討邾莒也邾莒連伐魯魯使告於晉悼公將為會以
討之遇疾乃止平公即位遂成父志朱子曰五霸
既衰梁之會諸侯出會而大夫自盟這箇自是差
異不好陳氏傅良曰文十五年盟扈十七年會扈
霸主在而但曰諸侯者無霸也此盟君在而但曰大
夫者無君也自文以下則有斥言諸侯而不序自襄

以下則有斥言大夫而不序項氏安世曰文七年書公會諸侯晉大夫盟于扈志變之始也雖然猶有諸侯也此書大夫盟志變之終也言自是無諸侯也張氏洽曰春秋莊十三年以前禮樂征伐自諸侯出而權未一也自桓文繼霸列國之政齊晉專之然猶在諸侯也至今年以後則皆自大夫出矣故於此書大夫盟著世變之益降也趙氏鵬飛曰君之所以立國者在權國之所以立權者在信權存則國存信去則權去梁之會諸侯會而大夫盟信在大夫也於是晉權漸移於六卿魯權日入於三家齊權屬崔高衛權在孫甯宋權歸於罕陳權歸二慶曹莒邾杞從可知爾權既移於下宜信之不在君而在臣也藉使君交盟而臣不欲則不保其無寒故寧聽大夫之欲而俾自盟焉則其信可必也平公承悼公之烈固可以因時而有為今衰經之中為是盟乃挈霸權以歸大夫何以示天下則平公之威令不及悼公遠

矣其後杞之城宋之盟皆出於大夫平公不與焉原
其失權之漸蓋自此始是以聖人謹之也 李氏廉

曰春秋書大夫者皆有所係盟蔬書齊盟扈書晉猶
係於國也救徐稱諸侯盟袁僑盟宋稱諸侯猶係於
君也獨此盟止書大夫公穀胡氏陳氏皆得之汪
氏克寬曰經書大夫不序者四救徐之役諸侯次匡
不行而遣大夫往救則大夫之帥師實受諸侯之命
也難澤之盟諸侯已盟而大夫又盟然猶受命而盟
袁僑也湟梁之盟則諸侯皆在而大夫自相與盟非
諸侯之命矣于宋之盟則諸侯不出而大夫自為會
盟矣然經於此年不大大夫繫之諸侯著大夫之無
諸侯也于宋之盟復以大夫繫之諸侯不使大夫之
終無諸侯也晉平即位十年之間七合諸侯湟梁祀
柯澶淵商任沙隨兩夷儀是也於斯時也苟能攬權
以挈政統明義而感人心則霸功之盛不惟可以繼
悼公之業而且可以踵桓丈之跡矣奈何首事之初

即以太阿之柄授之大夫而討罪服貳又素於義是以湜梁則高厚逃歸而執邾莒二君不歸京師且不能復魯之侵田平陰圍齊焚其四郭而齊猶不服遂以無功澶淵雖獲齊成實以齊莊欲求好於諸侯非誠服於晉厥後不免朝歌之伐商任沙隨錮樂氏而反召盈之亂國夷儀將以伐齊卒受弑君者之賂而同盟焉自是不復能合諸侯而大夫專出會盟矣原其失在於縱權於下世卿彊家黨惡怙亂不肯仗義以正諸侯是以致霸政之廢也王氏樵曰案晉悼公將為魯討邾莒未果而卒平公初立以父之志兼虞諸侯有異志故為是會以嗣霸而攬諸侯也然踰月而葬改服而烝其不懷親也甚矣方在喪稱子之日而合諸侯接會享使諸大夫歌詩必類其越於禮也大矣國君風化之本人倫政事之基而所為若是而不待大夫專盟而後可罪也

案淩梁之會諸侯在而大夫盟公穀皆以權移於大夫胡傳及朱子俱從之蓋經書大夫而不係於諸侯與杜丘雞澤不同則君若贅旒而大夫之不臣可知矣杜注孔疏謂大夫欲盟高厚厚逃而大夫共盟非大夫之專與公穀異揆之當時情事亦合今兩存其說

晉人執莒子邾子以歸

執以歸始此

左傳

以我故執邾宣公莒犁比公且曰通齊楚之使

集說

孫氏復曰晉平淩梁之會方退執莒子邾子以歸又不歸於京師非所以宗諸侯也高氏開

曰諸侯有罪執之以歸而不歸京師已則不臣而以討人非正也故稱晉人而二君不名家氏鉉翁曰

莒邾侵魯晉為執之莒邾信有罪矣魯之滅邾何獨無討而晉滅偃陽不當自反乎莒邾力屈而心未服

況不歸京師是無王也書以貶晉李氏廉曰經書
執諸侯十三惟此書以歸執大夫十四惟意如書以
歸

齊侯伐我北鄙

集說

高氏閔曰齊既叛晉聞公在會將討邾莒故復
來伐是時齊益強自柯陵之會遂不復出但使

大夫聽命使世子伋禮出會蓋有輕諸侯之心故前
年北鄙之伐為莒伐我邾實附齊故亦伐我南鄙晉
會涇梁以討莒莒邾畏晉往會而齊獨不至晉執二
君以歸齊乃益復伐我三年之間齊師五至於魯矣

夏公至自會

集說

高氏閔曰見公出會謀齊尚未及還而齊師已見伐矣

五月甲子地震

叔老會鄭伯晉荀偃衛甯殖宋人伐許

左傳

許男請遷於晉諸侯遂遷許許大夫不可晉人歸諸侯鄭子驕聞將伐許遂相鄭伯以從諸侯

之師穆叔從公齊子帥師會晉荀偃夏六月次於栲林庚寅伐許次於函氏晉荀偃樂廕帥師伐楚以報宋揚梁之役楚公子格帥師及晉師戰於湛阪楚師敗績晉師遂侵方城之外復伐許而還

栲林杜注許地

函氏杜注許地

湛阪杜注襄城昆陽縣北有湛水東入汝水經注湛水出犂縣

北魚齒山東南流為湛浦即此今葉縣北二十里有昆陽城

集說

劉氏敞曰左氏云書曰會鄭伯為夷故也言諸侯之卿可以會伯子男故示之義云爾非也主

兵者居上自其班列同者也諸侯與諸侯相從卿大夫與卿大夫相從若名位不敵卿雖主兵猶序諸侯之下貴王爵也去諸侯而言主兵者自可見爾何疑哉許氏翰曰先書鄭伯臣不可過君也高氏閔曰許欲棄楚請遷於晉既而不果故晉會諸侯大夫同伐之鄭與許有宿怨故君親行卿不先諸侯先國君也宋稱人蓋微者張氏洽曰許男有從晉國之志而大夫沮之足以見一時之俗矣李氏廉曰士穀主垂隴趙盾主新城而書會宋荀偃主伐許而書會鄭其事一也王氏樵曰案春秋之例用兵則主兵者為首大夫雖主兵不得在諸侯上此經所書正其名例左氏乃別生義曰為夷故也說者謂禮卿不會公侯而可以會伯子男此處欲示叔老可以會鄭伯故荀偃在下殊為曲說無理

秋齊侯伐我北鄙圍成

左作
圍邾

左傳秋齊侯圍邾孟孺子速徵之齊侯曰是好勇去之以為之名速遂塞海陘而還

海陘杜注
魯隘道

集說高氏閔曰去年伐我圍成而壞其郭今春再伐至是又圍成甚之也家氏鉉翁曰齊叛晉而屢以師伐魯欲致晉而與之戰其志在於爭霸也

大雩

冬叔孫豹如晉

左傳冬穆叔如晉聘且言齊故晉人曰以寡君之未禘祀與民之未息不然不敢忘穆叔曰以齊人之朝夕釋憾於敝邑之地是以大請敝邑之急朝不及夕引領西望曰庶幾乎比執事之間恐無及也見

中行獻子賦圻父獻子曰偃知罪矣敢不從執事以同恤社稷而使魯及此見范宣子賦鴻鴈之卒章宣子曰句在此敢使魯無鳩乎

集說高氏閔曰魯不能內修其政以禦無道之齊而乞憐於晉魯之君臣庸甚矣趙氏鵬飛曰言齊之見伐也故十八年晉率諸侯圍齊魯故也家氏鉉翁曰齊大國也魯亦望國也春秋於圍邾後書豹如晉著魯不為自治之計急則求晉亦可鄙矣

乙靈王十
巳六年

十有七年

晉平二年齊靈二十六年衛獻二十一年殤三年蔡景三十六年鄭

簡十年曹成二十二年陳哀十三年杞孝十一年宋平二十年秦景二十一年楚康四年吳諸樊五年

春王二月庚午邾子貜卒

貜苦耕反公穀作閭音閑

集說

杜氏預曰宣公也

孫氏復曰前年晉人執莒

莒子同此

蘇氏轍

曰不書其歸不告也

宋人伐陳

左傳

十七年春宋莊朝伐陳獲司徒印卑宋也

集說

高氏閌曰七年鄆之會陳侯逃歸自是不復與諸侯會而楚鄭連年侵宋宋於是請於晉而伐

之書伐許伐陳皆著楚之誑也陳氏傳良曰莊朝宋微者也曷為得書人微者唯討賊得書人大夫交

征於列國而後微者書人是故鄭皇武書宋莊朝書甚者秦庶長鮑越常壽過書家氏鉉翁曰宋撓楚

也十一年楚鄭伐宋撓晉也今宋人伐陳以撓楚春秋責之李氏廉曰伐而不書獲異於鄭人之侵蔡

獲變矣

夏衛石買帥師伐曹

左傳

衛孫蒯田於曹隧飲馬於重丘毀其瓶重丘人

而何以田為夏衛石買孫蒯

伐曹取重丘曹人愬於晉

重丘杜注曹邑寰宇記重丘在乘氏縣東北三十里今曹縣東北有乘氏故城屬山東兗州府

集說

趙氏鵬飛曰賢方伯在上諸侯無敢妄加侵伐衛無故而伐曹晉之累也故明年晉人執衛行

人石買

汪氏克寬曰孟子曰有人於此其待我以

橫逆則君子必自反也孫蒯犯上之臣凡民罔不惡

者也越竟田獵而遭曹人之辱盍亦內自省耳乃挾貴卿將重兵以攻其國不亦甚乎經之書伐所謂欲

加之罪不患
無辭者也

秋齊侯伐我北鄙圍桃齊高厚帥師伐我北鄙圍防

桃公

作兆高厚上

左無齊字

左傳

齊人以其未得志於我故秋齊侯伐我北鄙圍桃高厚圍臧紇於防師自陽關逆臧孫至於旅

松聊叔紇臧疇臧賈帥甲三百宵犯齊師送之而復齊師去之齊人獲臧堅齊侯使夙沙衛唁之且曰無死堅稽首曰拜命之辱抑君賜不終姑又使其刑臣禮於士以我扶其傷而死

陽關杜注在泰山鉅平縣東今兗州府寧陽縣東北有陽關故城旅松杜注近防地也

集說

孫氏復曰三年之中君臣加兵於魯者四齊之不道亦可知也高氏閌曰齊之君臣同來伐

我分兵以圍吾二邑其恃衆暴寡如此家氏鉉翁曰自鞏之戰齊屈於晉而內懷不平每欲釋憾於魯以致晉師今君臣異道而進魯三家束手無策春秋不惟責齊亦閔魯也

九月大雩

宋華臣出奔陳

左傳宋華閱卒華臣弱臯比之室使賊殺其宰華吳賊六人以鉞殺諸盧門合左師之後左師懼曰老夫無罪賊曰臯比私有討於吳遂幽其妻曰界余而大壁宋公聞之曰臣也不唯其宗室是暴大亂宋國之政必逐之左師曰臣也亦卿也大臣不順國之恥也不如蓋之乃舍之左師為已短策苟過華臣之門必騁十一月甲午國人逐癭狗癭狗入於華臣氏國人從之華臣懼遂奔陳

集說

杜氏預曰暴亂宗室懼而出奔實以冬出書秋者以始作亂時來告

高氏閌曰華臣暴其宗

室而亂

宋政不有國討失政刑

矣君子違不適讐國

陳乃宋讐而奔焉尤可誅也

王氏錫爵曰左師畏

華臣之強勸君蓋其惡而舍之而諉曰大臣不順國之恥也細人姑息之論耳異日者瘕狗入而華臣出

顧不恥歟

冬邾人伐我南鄙

左傳

冬邾人伐我南鄙為齊故也

集說

杜氏預曰齊未得志於魯故邾助之

王氏葆

魯之微弱不振亦可知矣國有政雖弱而疆國無政雖大必弱魯蒐于紅革車千乘豈曰無兵而陵夷至

此者三家分政民不知有君故也 高氏閔曰邾之
先君以伐魯而為晉所執既歸而卒嗣子在喪而復
興師伐我者叛晉與齊齊人使之修先君之怨也此
祝柯之會所以復執也 薛氏季宣曰乘齊之圍報
執之
讐也

附錄左傳

宋皇國父為大宰為平公築臺妨於農牧
子罕請俟農功之畢公弗許築者謳曰澤

門之哲實興我役邑中之黔實慰我心子罕聞之親
執扑以行築者而扶其不勉者曰吾儕小人皆有闔
廬以辟燥濕寒暑今君為一臺而不速成何以為役
謳者乃止或問其故子罕曰宋國區區而有詛有祝
禍之本也 齊晏桓子卒晏嬰羸縗斬苴經帶杖管
屨食鶩居倚廬寢苫枕草其老曰非大夫之禮也曰
唯卿為
大夫

丙靈王十有八年晉平三年齊靈二十七年衛獻二十七年

簡十一年曹成二十三年陳哀十四年杞孝十二年宋平二十一年秦景二十二年楚康五年吳諸樊六年

春白狄來

左傳

十八年春白狄始來

胡傳

劉氏敞曰周公致太平越裳氏重九譯而獻其白雉公曰君子德不及焉不享其贄此乃天子

而讓也況列國之君乎守藩之臣乎

集說

杜氏預曰不言朝不能行朝禮高氏閌曰春秋書白狄於是焉止白狄之來與介葛盧同

家氏鉉翁曰春秋之義會戎盟戎則有
譏介葛盧來白狄來之類則無絕也

夏晉人執衛行人石買

左傳

夏晉人執衛行人石買於長
子執孫蒯於純留為曹故也

長子純留杜注二縣皆屬上黨郡純
地理志作屯今俱屬山西潞安府

集說

杜氏預曰因其為使執之故書行人
曰十七年石買侵曹取重丘曹人訴之晉晉人

因其使而執之買則有罪而執之於其使則非禮也
故書曰執衛行人石買張氏洽曰石買之執有三

失焉舍大而治小一也行人非所執二也不歸於京
師三也三者有一不得為伯討而況於兼而有之乎

黃氏震曰為石買無故伐曹而執
之也然不當因其為行人而執之

秋齊師伐我北鄙

穀作齊侯

集說

杜氏預曰不書齊侯齊侯不入竟四年之中六伐鄙而四圍邑又縱邾莒以助其

許氏翰曰

虐諸侯之陵暴未有若是之甚者也是以動天下之

兵幾亡其國

季氏本曰齊之伐魯志在乎霸欲以

長驅中原三年之中五伐四圍而今又以

師伐暴亦甚矣安得不致十二國之圍哉

冬十月公會晉侯宋公衛侯鄭伯曹伯莒子邾子滕子

薛伯杞伯小邾子同圍齊

左傳

秋齊侯伐我北鄙中行獻子將伐齊夢與厲公訟弗勝公以戈擊之首隊於前跪而戴之奉之

以走見梗陽之巫皋他日見諸道與之言同巫曰今

茲主必死若有事於東方則可以逞獻子許諾晉侯

伐齊將濟河獻子以朱絲係玉二轂而禱曰齊環怙恃其險負其衆庶棄好背盟陵虐神主曾臣彪將率諸侯以討焉其官臣偃實先後之苟捷有功無作神羞官臣偃無敢復濟唯爾有神裁之沈玉而濟冬十月會於魯濟尋湏梁之言同伐齊齊侯禦諸平陰塹防門而守之廣里夙沙衛曰不能戰莫如守險弗聽諸侯之士門馬齊人多死范宣子告析文子曰吾知子敢匿情乎魯人莒人皆請以車千乘自其鄉入既許之矣若入君必失國子盍圖之子家以告公公恐晏嬰聞之曰君固無勇而又聞是弗能久矣齊侯登巫山以望晉師晉人使司馬斤山澤之險雖所不至必旆而疏陳之使乘車者左實右偽以旆先與曳柴而從之齊侯見之畏其衆也乃脫歸丙寅晦齊師夜遁師曠告晉侯曰鳥鳥之聲樂齊師其遁邢伯告中行伯曰有班馬之聲齊師其遁叔向告晉侯曰城上有焉齊師其遁十一月丁卯朔入平陰遂從齊師夙

沙衛連大車以塞隧而殿殖綽郭最曰子殿國師齊之辱也子姑先乎乃代之殿衛殺馬於隘以塞道晉州綽及之射殖綽中肩兩矢夾脰曰止將為三軍獲不止將取其表顧曰為私誓州綽曰有如日乃弛弓而自後縛之其右具丙亦舍兵而縛郭最皆衿甲面縛坐於中軍之鼓下晉人欲逐歸者魯衛請攻險己卯荀偃士句以中軍克京茲乙酉魏絳樂盈以下軍克邽趙武韓起以上軍圍廬弗克十二月戊戌及秦周伐雍門之萩范鞅門於雍門其御追喜以戈殺犬於門中孟莊子斬其楫以為公琴己亥焚雍門及西郭南郭郭難士弱率諸侯之師焚申池之竹木壬寅焚東郭郭北郭范鞅門於楊門州綽門於東閭左驂迫還於東門中以枚數闔齊侯駕將走郵棠太子與郭榮扣馬曰師速而疾略也將退矣君何懼焉且社稷之主不可以輕輕則失衆君必待之將犯之太子抽劍斷鞅乃止甲辰東侵及濰南及沂

梗陽杜注晉邑在太原晉陽縣南今太原府清源縣有梗陽故城平陰杜注在濟北盧縣東北其城南有防防有門於門外作塹平陰古城在縣東北三十五里今縣屬東平州巫山杜注在盧縣東北今濟南府肥城縣西北七十五里有孝堂山即齊侯望晉師處也京茲杜注在平陰城東南郭杜注平陰西有峙山郵棠杜注齊邑今膠州即墨縣南八十里有甘棠社即古棠鄉雒水經注雒水出琅瑯箕縣過東武平昌高密淳于逕都昌入海箕縣在今莒州東武故城今為諸城縣治平昌高密淳于皆在今安丘縣都昌今昌邑縣也沂杜注沂水出東莞蓋縣至下邳入海蓋縣省入沂水縣今屬山東青州府

胡傳凡侵伐圍入未有書同者而獨於此書同圍齊何也齊環背盟棄好陵虐神主肆其暴橫數伐

鄰國觀加兵於魯則可見矣諸侯所共惡疾故同心而圍之也同心圍齊其以伐致何也見齊環無道宜得惡疾大諸侯之伐而免其圍齊之罪辭也春秋於此有阻橫逆抑強暴之意孟子曰國必自伐而後人伐之自作孽不可逭其齊侯環之謂矣尚誰懟哉

集說

杜氏預曰齊數行不義諸侯同心俱圍之陸氏淳曰齊背盟主數伐小國諸侯同心故特書

曰同圍劉氏敞曰穀梁曰非圍而曰圍非也春秋信史也若未圍而言圍豈得為信史哉程子曰書

同圍見諸侯之惡齊許氏翰曰環而攻之焚其四郭故謂之圍曰同圍齊言得罪於天下也家氏鉉

翁曰或謂鞏之戰晉為魯衛而伐齊春秋不與也今晉平為魯伐齊而春秋與之何耶事有似同而實異者兩伐齊是也鞏之戰雖曰為魯衛出師其實大夫逞其私憾春秋不與也今茲伐齊靈背盟好歲以兵

加於魯晉為之合諸侯以問齊人憑陵與國之罪從
衆欲而出師非為其私也故書同圍齊此聖人之特
筆非因乎舊史者也鄭氏玉曰莒邾嘗病魯矣滕
薛小邾嘗屬齊矣今圍齊莫敢不同者晉人以大義
驅之也王氏樵曰齊環恃其桀暴虐鄰殘民四年
之中至於六伐鄙而四圍邑不道之甚為諸侯所共
疾也晉討得其罪與衆同欲而非為其私也故書同圍以與之

曹伯負芻卒于師

集說杜氏預曰禮當與許男同劉氏敞曰穀梁
曰閔之也非也是亦記事而已矣何閔之有

楚公子午帥師伐鄭

左傳鄭子孔欲去諸大夫將叛晉而起楚師以去之
使告子庚子庚弗許楚子聞之使揚豚尹宜告

子庚曰國人謂不穀主社稷而不出師死不從禮不穀即位於今五年師徒不出人其以不穀為自逸而忘先君之業矣大夫圖之其若之何子庚歎曰君王其謂午懷安乎吾以利社稷也見使者稽首而對曰諸侯方睦於晉臣請嘗之若可君而繼之不可收師而退可以無害君亦無辱子庚帥師治兵于汾於是子驕伯有子張從鄭伯伐齊子孔子展子西守二子知子孔之謀完守入保子孔不敢會楚師楚師伐鄭次於魚陵右師城上棘遂涉潁次於旃然為子馮公子格率銳師侵費滑胥靡獻于雍梁右回梅山侵鄭東北至於蟲牢而反子庚門于純門信於城下而還涉於魚齒之下甚雨及之楚師多凍役徒幾盡晉人聞有楚師師曠曰不害吾驟歌北風又歌南風南風不競多死聲楚必無功董叔曰天道多在西北南師不時必無功叔向曰在其君之德也

汾杜注襄城縣東北有汾丘城水經注潁水東歷
置丘城南故汾丘城也今襄城縣屬河南開封府

魚陵杜注魚齒山也在南陽驍縣北鄭地水經
注湛水源於魚齒山今在汝州東南五十里上

棘郡縣志陽翟有上棘城今在禹州南旃然杜
注旃然水出滎陽成皋縣東入汴水經注索水出

京縣西南嵩渚山即古旃然水也嵩渚山在滎陽
縣東南三十五里胥靡杜注鄭邑獻于杜注

鄭邑雍梁杜注鄭邑河南陽翟縣東北有雍氏
城梅山杜注在滎陽密縣東北今開封府鄭州

西南三十
里有梅山

集說薛氏季宣曰楚公子午之伐間鄭伯之出也乘
人不備而迄無成功黷武而已矣李氏廉曰

此蕭魚之後楚
兵又至鄭也

欽定春秋傳說彙纂卷二十六